


特 別
^18
4892
22





八 18
4892
22



明詩綜卷六十一

小長蘆 朱彝尊 錄

錫山 秦祖然 緝評



錢士升 一首

士升字抑之嘉善人萬曆丙辰賜進士第一累
官太子太保文淵閣大學士

靜志居詩話相君晚達爰立未久旋
遂初衣薦丁亂離故其詩多鬱轉

南園即事

世情不到處獨寤寐歌時但有雲山入兼無樵牧知竹
光虛牖白花氣雜林遲不覺斜陽下鄰家起晚炊

劉榮嗣 三首

榮嗣字敬仲曲周人萬曆丙辰進士除戶部主事調吏部歷郎中累官至工部尚書總督河道

有半舫集

錢受之云敬仲詩操南音不類河北僮父用意冲遠自謂迴出時流德州盧世淮德水篤好之句詮字釋以為

獨絕唐人之鑄賈島宋人之宗涪州無以過也

詩話尚書銜命治河時駱馬湖潰運道填淤乃創挽河之議起宿遷至徐州別鑿新河分黃水注其中以通漕運計二百餘里費金錢五十萬邳州上下悉河流故道濬之尺許皆沙掘之為河經宿沙落河坎復平迨引黃水入波流迅急衝沙而下往往成淤明年漕艘至駱馬河潰流適平運丁惟願入加不願由新河尚書雖躬督之論以軍法間有入新河者舟輒膠於是南給事中曹景參上疏特糾落職提問下獄論辟獄未解而卒朝野之論以尚書河渠之任本非所長皆誤信門客之說用違其才為可惜其後駱馬湖復潰舟行新河人頗稱便焉至其詩格卑卑未能遠與古人方駕

白石莊萬都尉園作

仙圃宜秋色相將戀夕曛松青新濯雨槐古舊侵雲竹

牖池光合山樓石翠分鳳簫遺韻在擬向月中聞

題画 二首

老去登臨怯杖藤好山不上最高層疎松幾樹斜陽裏閒看巖前掃葉僧

灌木陰陰溪水斜溪頭鷗鷺浴晴沙春潮退後風生急魚網船梢挂落花

彭汝楠 一首

汝楠字伯棟莆田人萬曆丙辰進士除會稽知縣入為禮科給事中累官兵部左侍郎贈尚書

讀黃維章辯疏有感

聞道欃槍未掩芒驚聞龍戰又玄黃赤眉豈遂移炎漢

白馬還宜鑒李唐君子獨為洵足恥黨人不與亦何妨
聖明自是如天宥黽勉同心定我王

潘曾紘 二首

曾紘字昭度烏程人萬曆丙辰進士歷官僉都
御史巡撫南贛崇禎中提兵入衛卒于軍有芳

蓀館遺豪

大柳驛守歲

古驛逢梅發荒邨帶柳斜雪明難入夜山霽易蒸霞碧
篆消燈暈黃沙拂劔花男兒應有氣可復負年華

金陵感遇

花發垂垂歸興濃便教歸去若為容日邊潮合迷前浦

雨後烟開出數峰楊柳暗彫江岸笛松楸靜落寺樓鐘
閭閻三月音書斷夢入燕關第幾重

申紹芳 一首

紹芳字維烈長洲人萬曆丙辰進士初任應天
府學教授遷南京國子助教升禮部主事歷郎
中調吏部出為山東按察副使累官戶部右侍
郎

送張玉笥中丞進擢總河

玄圭初錫自宸衷四載勤勞特借公開府夙推真使相
導河新命少司空舳艫風引桃花浪海甸雲興瓠子宮
何獨甘棠思召伯轉輸專倚鄴侯功

日言然卷之十一
三
方大任

三首

大任字玉成一字逢吉桐城人萬曆丙辰進士
除元城知縣擢廣西道御史天啓末魏璫營生
壙僭侈踰制特疏糾之削籍崇禎初補官升僉
都御史巡山海關尋以副都御史撫順天有霞
起樓詩草

詠懷

三首

束髮慕奇癖讀書萬卷餘游思緬邈場削跡芬華塗舉
世爭捷徑欣然笑其愚稟氣固已然改轍將焉如孔生
恥溝壑原子安桑樞素志亮有託斯人豈盡迂掩耳謝
時賢一心抱區區

徘徊芳塘上微風扇輕波連岡蔭青松仄徑冒綠莎是
時秋正深杭稻蕃陂陀腰鎌朝出隴捆載夕歸家鳥雀
啄場圃牛羊散巖阿曰余無立錐鼓腹行謳歌拾穗甌
窶間一飽不願多嗟彼攘攘子鼎食終如何

孔雀游赤霄牛角何由觸麒麟可繫羈翻為犬羊辱伊
余類窮猿投林不擇木悠悠長傷人顧影傷局趣百鍊
忤時好繞指乖素欲犁鋤儻可給誓息西山麓

方孔炤

四首

孔炤字潛夫桐城人萬曆丙辰進士除嘉定州
知州調福寧州入為兵部員外歷郎中魏忠賢
欲兄子良卿為伯執不覆削籍歸崇禎初起尚

寶卿以副都御史巡撫湖廣忤楊嗣昌坐兵敗
繫獄嗣昌死屯撫河北卒門人私謚貞述先生

新設屯田

廟議既不與屯田徒有名河北山東地水利難與爭當
先布賞格有司乃奉行隱覈召民種亦須三年成吁嗟
恐不及不如先議兵兵既不如此議田亦何由耕

密議歎

楚人歌秦人舞櫺檉衣傳兩杖鼓殿上伏機多危語密
議知與外廷忤外廷不知乃連章以為朋黨飛嚴霜

謁方正學先生祠

鍾陵松柏對蒼蒼近代南山祀太常寧可紙灰埋十族

不將銘志屬三楊髡緇江上人何在縞素軍前獨發喪

斷事只今依俎豆吾家書種託門牆

先五世祖諱法中洪武應天已卯出正學先生門為

四川斷事間靖難投江今補祀表忠祠

和客傳言

多選中涓辦隊裝明光甲片日爭光原來第一安邊策
只在新開內教場

張瑋 二首

瑋字韋玉武進人萬曆己未進士除戶部主事
歷兵部郎中出為廣東僉事仕至都察院協理
院事左副都御史卒謚清惠有如此齋集

江行宿淺灘

千里江流此一灣暮潮落盡柁師閒
脩脩蒼荻鳴疎雨
隱隱玄雲列遠山波靜自知憑岸穩
官慵肯厭客塗艱
朝來宴起迎新旭秋月秋風興不慳

嘿思仲先約過詹所茶山園以事不偕
小詩代訊
一徑寒雲似練開茶烟起處小車來
獨憐久病閒雙屐
不踏孤山十畝苔

萬 燦 一首

燦字闇夫新建人萬曆丙辰進士除刑部主事
調工部歷屯田郎中首劾魏忠賢廷杖流血死
贈太嘗少卿追謚忠貞

詩話天啓中忤魏燦慘死者先後一十七人萬公首受其禍公初任營
繕主事轉屯田郎先管寶源局而陵工其職掌也因內官監廢銅不發

疏言其姦謂忠賢珠玉盈筭金銀滿屋何欲不遂顧此廢爛銅器無足
入其目而必一手握定者其設心以爲不若是無以操天下之利權既
操天下之利權不難攬天下之政權臣有以窺其微矣疏入矯旨於午
門杖一百奄人數十輩蠡擁牽衣掉髮而前杖後伏小璫於闕下摑擊
錐刺踰四日而殞李忠毅上言曰燦死矣未報國恩先填溝壑六尺之
孤繞膝八旬之母倚闈旅櫬無歸游魂戀闕臣僚飲泣道途咨嗟然共
知非出於陛下之心也臣不暇爲燦寃爲陛下冤損好生之德負殺諫
臣之名豈所以作忠勸士哉夫人臣緘口以待遷厚利也危言以招戮
實禍也身死而天下悲其忠虛名也舍保身家榮妻子之計博此虛名
飢不可食寒不可衣將焉用之况乎傷殘父母之遺體以從龍比於九
京人非僕隸法非訊囚罪至死刑命非草芥廷杖之舉殊失士心直俟
公論明而卹死錄孤嗟何及矣被旨以瀆擾詰責蓋自公死忠賢知外
廷之無奈彼何由是鈎黨
之獄興而縉紳之禍烈矣

登黃鶴樓

我欲乘黃鶴飄然物外遊檻前懷古淚且爲彌衡收

魏大中 二首

大中字孔時嘉善人萬曆丙辰進士授行人歷

官吏科都給事中死奄禍贈太嘗寺卿謚忠節
有藏密齋集

詩話忠節骨鯁之臣然頗留心風雅里人王屋布衣能詩公見其賦秋蘭作為之擊節值文會公曰孰為賦秋蘭者起而復揖之布衣感公之知公被逮日徒步送之境外揮淚而別

良鄉縣

彰義門西路桑乾古渡分長羈乘傳馬不斷出關軍沙
白迷荒戍城黃壓暮雲車牛徵到骨募派底紛紛

息游

一夜秋聲萬木寒乾坤何處足彈冠時名盡向黃金起
世事都堪白眼看已自故人嗟落魄更誰同病問加餐
風塵伏枕衡門穩行路於今轉覺難

陳熙昌 一首

熙昌字 南海人萬曆丙辰進士除平湖知

縣擢吏科給事中

東湖雜詩

乍浦瀛壖曲遙連蘆瀝場迎船桑葉白繫纜菜花黃塔
影開初地鐘聲落上方孤城非鐵甕先事慎隄防

詩話乍浦孤城如彈丸倭寇入犯之衝經國者不置重兵於其地綢繆
牖戶之謂何陳公作宰在太平之日先有隱憂矣予嘗過其地登湯山
山舊有塔寺僧持疏募重建予亟語縣令已之蓋
洋船望見塔易指點入口之路不可不深慮也

朱泰禎 一首

泰禎字道子海鹽人萬曆丙辰進士除龍巖知
縣調漳浦選授福建道御史巡按雲南有遠人

樓詩集

睡鴨

綠萍掃罷柳梢齊
疎雨斜陽思轉迷
此際池塘眠正穩
風花吹夢過橋西

曹守勲 一首

守勲字熙載新蔡人萬曆丙辰進士知曹縣考

授浙江道御史出為陝西按察僉事歷陝西副

使

題韓淮陰釣臺

城陰片石俯淮流
想象王孫此釣遊
若問將臺何處所
未央宮殿總荒丘

李應昇 一首

應昇字仲達江陰人萬曆丙辰進士除南康推

官擢福建道御史死奄禍贈太僕寺卿諡忠毅

有落落齋集

詩話王紹徽撰東林點將錄阮大鍼名亦與焉大鍼初與李忠毅魏忠
節相善及忠節補吏垣大鍼疑忠節有意逐之遂結傅樾黨於魏監忠
毅猶憶舊交貽之書云昔正叔子瞻一生樹敵到底同鑄黨籍之名若
使蔡確之徒欲分收一人以去二君子必不願也可和可爭必不受小
人之攀援斯君子之品乃見而大鍼既投瑞幕者已絕於諸君子矣及
忠毅被逮於檻車賦詩云細數知交在道遙各一方魏齊方睥睨阮籍
亦猖狂形影悲相弔音書夢已荒古人不可作搔首問蒼蒼抑何其忠
厚之深也魏齊指嘗熟魏浣初阮籍則指大鍼其後居南京諸生顧杲
等一百四十人草檄討之既而附馬士英得志導之重翻三案誅
鉏正人僉壬之反覆真同鬼域雖有詠懷堂詩吾不屑錄之也已

哭季弟

憶爾迎還權悲歌分外深
逐臣生死日歸老弟兄心慄

慨歌聲發飛揚酒力任呼盧狂竟夕清夢到而今

黃尊素 一首

尊素字真長餘姚人萬曆丙辰進士除寧國推官擢山東道御史削籍被逮死詔獄贈太僕寺

御追謚忠端有集

楊維斗云先生抗慨孤直詩篇激而不傷

詩話忠端以考選入都時門戶紛爭多以挺擊紅丸移宮三案占人向背客問公以三案如何決擇公曰光宗棄羣臣久今上御極亦非一日三案皆往事恐朝廷所急不在此客無以難也又曰上未登極之先移宮為是御極之後安選侍為是二者祇爭先後不分是非斯皆持平之論惟公之立朝不亢不阿專事補救令楊魏二公從之禍豈若是其酷乎崇禎初死奄禍諸臣止謚及高楊魏周四公論者多咎姚文毅之過刻公與萬左素顧繆李及三周公久而易名謚法守禮執義曰端君子以為宜文文肅作神道碑銘云於惟黃公憂來無方惕號同志戒其用剛蓋得其實也

春日早行

抗旌經古道暝色未全分漸隱林間月微生海際雲輕陰開積翠細草落青芬誰破瞳瞳曉鳴禽客底聞

黃承昊 四首

承昊字履素秀水人萬曆丙辰進士除大理寺評事選吏科給事中歷刑戶工三科左右給事出為河南按察副使加參政轉福建按察使有

閨齋吟橐

陳仲醇云閨齋詩高華而不傷氣幽微而不損神流便而不降格 李君實云閨齋風華婉麗詩品在開元大

閨

閒居夜雨 二首

夜半瀟瀟竹輕寒枕上侵明朝無別事風雨不關心多少閒花草朝朝抱甕忙園丁今夜睡晏起亦何妨

過長溝見蜀山湖荷花沿堤二十里有作

雲山渺渺水悠悠香滿長堤物外秋只少若邪溪上女
乘潮一弄采蓮舟

塞上曲

鄉月多情伴我來沙場相對不勝哀明朝生死知何處
且解征袍醉一回

素中道 五首

中道字小修公安人萬曆丙辰進士授徽州府
教授遷國子博士升南京禮部主事歷郎中有

珂雪齋集

錢受之云小修詩
文有才多之患

詩話小修才遜中
郎而過於伯氏

述別為丘長孺

哀哀一孤鴻飛急向東邁傷哉金石交三載乃相會相
會能幾何一見不復雙子尚滯西陵我遂往鑿江鑿江
不忍別復有攝山行攝山不忍別逐子至冶城冶城不
忍別十日淹江頭飲子清冷酒卧子木蘭舟酸心一夜
風舉目三千路別矣可奈何含淚入城去

郢中送春曲

總以堂堂去何容緩緩歸隔溪鶯對語掠水燕雙飛野
草香沾屐修篁翠濕衣山花一樹好游女摘來稀

九日登中郎沙市宅上三層樓

滿眼傷心處誰能上此樓林烟迷蜀道帆影識吳舟硯

北人何在江南草又秋
茱萸空到手欲插淚先流

七夕同彭長卿中郎

清談閒送可憐宵
竹戶斜通宛轉橋
白水青林秋澹澹
好風涼月夜蕭蕭
貧來野客傷時序
老去詩人怨寂寥
驚鳥不鳴更漏靜
如聞銀浦弄輕潮

投贈太保蹇令公

三朝元老帝長城
胸貯雄邊百萬兵
太尉領軍陪漢相
上公分陝護周京
卿雲不散投戈色
夜雨猶聞洗甲聲
白袷青編無一事
蕭然還是舊書生

彭汝諧 二首

汝諧字原樂吳縣人萬曆丙辰進士有蔚菴逸

草

游桃源澗

碧澗山隈轉鳴泉
樹杪懸桑麻緣屋宇
雞犬隔人烟
客避中峰雨
僧安一宿禪
桃花今又放
相問世何年

從鄧尉山中還至虎山橋坐月

平林漠漠烟光齊
花氣霏霏醉欲迷
欸乃湖中小舟小
蒼黃日下西山西
寒鴉飛盡渚涯闊
白苧歌殘月影低
露冷霑衣萬籟靜
伊啞邨落催晨雞

沈德符 八首

德符字虎臣一字景倩秀水人萬曆戊午舉人

有清權堂集

錢受之云自王李之學盛行吳越間學者拾其殘
瀋相戒不讀唐以後書景倩獨近搜博覽其於兩

宋以來史乘別集故家舊事往往能敷陳其本末疏通其端緒家世仕宦習聞國家掌故且及見嘉靖間名流遺獻講求故事網羅放失勒成一大家之言惜其未就也其論詩宗尚皮陸及放翁與同時鍾譚之流聲氣雖合而格調迥別不為苟同 陸叔度云先生詩發端必密疊韻不置不踐王李之迹亦不操王李之戈前無津筏之求後無瑕玷之慮蓋風人之流與 朱雲子云虎臣大家然有流宕之句詩雖不必拘拘漢魏盛唐而醞藉之與淺俗渾雅之與雅鄙不可不辨也 詩話孝廉生稟異質日讀一寸書所撰萬曆野獲編事有左證論無偏黨明代野史未有過焉者其詩寧取公安竟陵欲盡反歷下瑯琊之弊故多豔字側辭雪蠟星碎未免病於才多也

秋暮咏懷

百歲電泡爾疇不慕長年究意命制之修短非我權玉局出從地玉棺墮自天大丹紫汞鍊神鼎白石煎尅日飛舉人不久歸重泉信哉服食誤以藥求神仙

人日

挑菜傳人日山邨樸未知雪深添酒券風橫緩燈期歲事因貧略春光遇閏遲梅園縱深閉宜賞寂寥時

送李元白都運之揚州

度支聖世借前籌誰似江淮地望優宰相杜棕充轉運司徒王導領揚州軍需西北勞臣勸民力東南國士憂 輝饋古來功第一進賢何待鄂千秋

苦雨

物候違朝爽山容失夕佳陽烏三舍避黑蜩百靈差故恣商羊橫先收魃鬼埋屋頽無可漏牆壞不須排廢沼平多日新堤潰少厓衢高猶嚙屐巷溢或通簿暫步擔 蔡遍徒行沒甃皆居如潛島嶼出似泛河淮耳欲生禾

明詩總卷六十一
穎塵難屑麥黠浸畦浮菜甲墮坎沒松釵是埕俱鳴鸛
無坳不產蛙飲泉偏沃蚓升壁但資蝸穴牖呼鄰酒乘
橈覓市鮭炊艱憎浙米薪濕喜枯芟圖史濡難展屏奩
潤易措迂行甘躑躅愁坐廢詎俳護築宵加版存扉晝
瑾柴其魚興浩歎乃粒軫孤懷議禮應雩禱祈晴儻祀
崇何時扇障日利屣上長街

邗城新曲

明月可憐宵曾聽教玉簫佳名二十四第一擣衣橋

天啓宮詞

三首

二廣雙甄陣脚牢御營日麗戰雲高封章臺瑣俱休進

萬乘臨戎正內操

自注唐以左右
神策軍為二廣

歲除舊例幸椒房中尉今宵別上觴角觝互呈宮漏短
便陳庭燎御明堂

白驪唐代御玄宗踣後將軍始受封爭似生叨三品料
驪駒賜號小烏龍

鄭士奇

一首

士奇字平子嘉興人萬曆戊午舉人署臨安儒
學教諭遷知贛州興國縣以耳聾告歸有松牕
老人橐

釣臺懷古

擇地逃新室披裘對故人星原占是客帝豈得而臣瀨
急迴潮信壇高費釣緡不知梅福女偕隱幾冬春

姚希孟

三首

希孟字孟長長洲人萬曆癸未進士改庶吉士授簡討歷左贊善左諭德出為南京少詹事贈禮部右侍郎謚文毅有公槐響玉棘門沆瀣秋旻文遠循滄松瘦伽陵風吟等集

陳皇士云先生詩春容雅麗有館閣

風

詩話逆案將定思陵發建祠稱頌諸疏申命內閣詳閱限以數日確議來奏輔臣難之求助於文毅文毅中夜不寐周步堂中其容周生進而問公公語之故生曰某於七年中逆知魏客之必敗以詣附諸臣分其罪自謂無道情公取而權衡之可乎公覽之擊節稱善次日進於軒臣皆以為當據之入奏生吳江人或曰秀才永年安期或曰永年之弟永言安仁也爰書既定天下咸服凌遲處死者二人擬斬者二十五人充軍者十一人贖徒者一百三十一人冠帶開仕者四十四人雖有漏網然吞舟之魚鮮矣

送齊越石守紹興

萬壑爭流處溪山屬剡東扁舟仍雪夜五馬自春風官舍朝嵐滿人烟夕照同蓬萊讓仙吏安坐翠微中

謁景皇帝陵

低回往事不堪陳誰抱遺弓泣紫宸遙共裕陵今夜月可憐邨邸故園春朔方老將黃沙苦西市尚書碧血新陟降在天應不遠蕭蕭松柏卧麒麟

秋感

秋容已到菊花枝閉戶蕭然誦楚詞憔悴江籬人不見滿庭涼月照相思

顧錫疇

一首

錫疇字九疇崑山人萬曆己未進士改庶吉士

授簡討天啓中削籍崇禎初以原官起用歷贊
善諭德掌司經局遷國子祭酒假歸補少詹事
起禮部左侍郎升尚書有握日草

詩話建文四年事蹟革除之後文獻俱不足徵相傳長陵用王景議葬
以天子之禮然鍾山之麓一坏安在祀典無聞則其說妄也其曰葬之
西山既不封不樹矣安得又表曰天下大師之塔要其說更妄也自弘
治中禮部主事楊循吉首請追諡建文君隆慶初東莞布衣譚清海請
復革除年號告之高廟而追上建文君諡萬曆中通政使沈子木國子
司業王祖嫡禮部尚書范謙給事中楊天民御史牛應元先後進言得
旨存其年號崇禎中繼以給事中張國維禮部侍郎呂維祺給事中沈
崇培駙馬都尉鞏永固而衰卹之典久而未舉迨顧公典禮容臺始定
議建文君諡曰嗣天章道誠懿淵恭親文楊武克仁篤孝讓皇帝廟號
惠宗馬后曰孝愍溫仁貞哲睿肅烈襄天弼聖讓皇后尋追贈死節
諸臣子諡贈太師者文學博士方孝孺魏國公徐輝祖贈太保者兵部
尚書鐵鉉禮部尚書陳迪刑部尚書暴昭御史大夫練子寧贈太子太
保者禮部侍中黃觀戶部侍郎卓敬副都御史茅大方贈刑部尚書者
大理少卿胡閏贈詹事者衡府紀善周是修贈禮部侍郎者翰林修撰
王叔英贈副都御史者浙江按察使王良贈太常卿者刑科給事中黃
鉞贈太僕卿者御史高翔曾鳳韶蘇州知府姚善贈太僕少卿者知沛

縣事顏伯璋贈大理少卿者谷府長史劉璟贈翰林待詔者金川門卒
龔翊及伯璋子有為贈禮部員外郎者濟陽儒學教諭王省贈平陽伯
者都指揮瞿能贈含山伯者都指揮朱鑑贈指揮使者燕山衛卒儲福
謚文正者方孝孺謚文貞者黃觀謚文忠者王叔英謚忠襄者鐵鉉謚
忠烈者陳迪胡閏景清謚忠貞者練子寧卓敬徐輝祖謚忠毅者曾鳳
韶王良謚忠獻者黃鉞謚忠惠者姚善顏伯璋謚忠愍者茅大方高翔
謚忠義者儲福謚貞毅者周是修謚貞烈者王省謚剛烈者暴昭謚剛
節者劉璟謚襄烈者瞿能謚壯烈者朱鑑謚安節者龔翊謚孝節者顏
有為以上公論交乎此外得謚者又五十二人曰節愍齊泰黃子澄張
曷盧原質葉福也曰介愍胡子昭也曰忠愍俞逢辰也曰直愍宋徵也
曰肅愍周璿也曰貞愍鄒瑾譚翼石撰陳思賢也曰穆愍陳彥回林嘉
猷也曰襄愍王度也曰果愍邊昇葛誠也曰翼愍金有聲也曰莊愍樊
士信張彥方也曰忠莊王彬也曰惠莊鄭恕也曰義節唐子清也曰忠節陳
林英也曰莊節周季瑜也曰惠節鄭恕也曰義節唐子清也曰忠節陳
性善也曰忠介程本立也曰莊介韓永也曰忠毅高巍也曰清毅郭任
也曰毅直戴彝魏冕巨敬也曰端直程通也曰貞直杜奇也曰忠貞侯
泰也曰貞勤謝昇也曰貞確徐子權也曰貞達盧迴也曰貞穆林右也
曰貞定甘霖丁志方也曰剛烈連楹也曰端果龔泰也曰莊景陳繼之
也曰果義黃謙也曰文忠陳忠也其中不無濫及蓋不能不惑於野史
之紀述然如梁田王史仲彬輩不與則不可謂顧公無卓識也首陳其
說者萬公元吉佐其事者李公清惟是吾鄉高太嘗遜志卹典闕焉後
之君子覈其實而損益之可矣顧公致仕歸晚入閩道出溫州為悍帥

所殺詩罕流傳
錄其題扇一絕

西湖

臨安宋故都荷花仍十里際曉湖光平鷓鴣鳴不已

侯恪二首

恪字若樸商丘人萬曆丙辰中會試己未殿試
進士出身改庶吉士授簡討削籍崇禎初起右
中允歷諭德庶子出為南國子祭酒有遂園詩

集

詩話侯公以史官秉南董之筆為逆奄所惡晚又忤烏程移留都洵古
之遺直也詩以大雅自命嘗言詩自三百篇後存亡者三漢魏存矣六
朝亡也唐存矣五代宋元亡也國朝正嘉存矣今又亡也其持論
深惡新體伸北地信陽而抑嘉靖七子九痛詆公安竟陵流派云

感時和張叔載

傷心日日賦登樓聽爾哀歌續四愁欲向風塵歸故里
不堪戎馬暗神州金錢歲入渾難計鎖鑰朝傳尚有求
辛苦先朝張相國于今零落楚江秋

送陳集生使南海

鳳闕春深柳乍齊王孫臺畔草萋萋看君絳節天南去
驛路晴花送馬蹄

丁乾學一首

乾學字天行宛平人萬曆己未進士改庶吉士
除簡討天啓中落職有擁膝齋集

送劉太史使朝鮮

漢殿遙齋詔一函香爐特許換朝衫天邊築館迎龍節

海上吹鏡遁蠻帆問俗朱蒙時已改探奇暘谷日應銜
歸來擬得殊方志天外河流海外巖

陳萬言

四首

萬言字居一秀水人萬曆己未進士改庶吉士
有鉅園集

出門

出門澹無營閒步郭北隅四野一何曠仰見秋雲徂微
風動蕭林殘暉息遠墟忽然霞氣新散綺照輕裾高歌
以忘憂薄言返故廬

苦雨

四月淫霖降五月不可遏祝融正司方雨師乃攘奪晴

雲乍卷舒倏忽變陰靄飛瀑寫層簷散絲起跳沫殷殷
雷轟車熒熒電排闥欹枕不成寐但聞鄰語聒晨起問
農事何以曳屨鞞呼童渡郊西爲我鼓雙轆推篷瞰四
野洪水勢方割蛟龍成一氣桑海莽空闊田疇盡淪
槽巢倚木末門吏追逋錢入室尚呼喝枵腹不能對相
向蹙眉頰此意隔九閻圖繪難具達安得沉石犀永使
洪濤闕

逢萌祠

炎精熄中葉閏位爭美新黃龍德有悔賢哲甘沉淪感
茲三綱絕大義疇能伸鴻飛貴先時冥冥謝弋人解冠
挂東都盡室逐海濱同時景明哲亦有梅子真寧爲吳

門卒恥作禿髮臣二子不可作誰其嗣清塵

長夏憩澹止園

辭家謝塵慮結意在巖壑登高畏炎蒸園林寄幽託澄
湖逼遙岑仁智均所樂入徑參茂松環洲雜芳若灌木
挺喬榦疎篁解新籜中有百尺樓凭虛蔭寥廓青山四
壁垂雲氣屢迴薄朝汲葛翁水夕放支公鶴披襟步湖
渚飄風散花萼逃暑蕩蘭榭迎涼啓羅箔清宵寂無人
倚石縱磴礪歸偃北牕隅三五映籬落覽化得沉冥感
遇任離索物理本如此俯仰亦何忤

吳麟瑞 二首

麟 子思王海鹽人萬曆己未進士除常州推

官徵授南京禮部主事轉吏部進郎中升湖廣
參政歷江西副使按察使右布政使以僉都御
史撫偏沅有哀鴻秋蟀諸集

除夕

歲盡愁無盡殘鐘客思微一官滄海遠萬里白登圍越
鳥栖初定燕雲信轉稀枕戈空待曉無術報宵衣

長安春興

塵封官柳眼猶迷黃鳥吞聲不肯啼二月羽書淹塞草
十年馬足負香泥長纓有策終難請短札多愁未易題
忽憶孤山此時節亂堆雪片斷橋西

玄 默 一首

明詩總集卷之十一
默字會一靜海人萬曆己未進士除懷慶推官
擢吏科給事中歷戶科都給事升太嘗少卿以
都御史巡撫河南

泥溝驛

寒雲漠漠月初彎邨舍無人戶早關十二樓中愁積雪
不知人在賀蘭山

李吳滋 一首

吳滋字如穀吳縣人萬曆己未進士知崇安德
清龍溪三縣遷南刑部主事歷郎中出知寶慶
武昌二府升湖廣按察副使有鳳棲閣詩集

送曹安祖假歸

陶然共事白雲司幾度追隨笑語時年齒偶成一日長
禪心同對十門師每分陽羨驚雷策迭和青谿踏雪詩
君去冷曹方是冷閒居賦就寄無遲

高道素 九首

道素初名斗光字明水一字如晦更字玄期嘉
興人萬曆己未進士除工部主事歷郎中以督
造桂府殿傾論死有景玄堂詩集

錢受之云工部詩
文陶冶情性不事

剽賊故能秀出天外 陳元孝云屯田詩俊
逸朗徹 顧茂倫云先生五律清真春雅
詩話水部才思兼人不以格律自拘古今詩皆超詣五律尤為長城當
桂藩分建奉命將作南方界濕薄樞甫新大璫亟事丹墀水部力爭不
得既而雷震柱頤吏議周
內遂罹顯戮聞者寃之

兗州道中寄內

黃沙蔽天氣白日無晶光寒雲何蕭條四野青茫茫驚
颺激車輪我馬亦玄黃憶昔出門去臨別重傷復九月
無裳衣五月無糗糧酸辛各自愛努力願相望悠悠二
千里安得到汝旁中宵不能寐輾轉心憂傷

臨淮秋夜

鳴橈伐鼓漾回波美酒千鍾開權歌秦箏甫停越謳發
落日微風雙翠蛾芳年易盡瑤華晚白日朱顏愁不返
橫笛他鄉未忍聞空齋獨坐成長歎

秋日寄沈無回

涼風起庭際簾幕迴秋陰一葉空階落孤燈獨坐深芙
蓉思遠道蟋蟀動愁吟誰念閒居客能傷遲暮心

業子

雪夜渡鎮江

江水寒猶激方舟夜未央驚濤沉鐵甕急雪下丹陽獨
坐親孤燭商歌送羽觴白門遙在望葭菼鬱蒼蒼

穀昌

過清流關

設險何年事登臨四望賒天門閒虎豹地軸轉龍蛇王
氣粉榆社風烟博浪沙棄繻關下客懷古一長嗟

雲

阻雨彭城驛寄懷李九疑禮部

乍失河陰樹難分淮泗山寒烟原上白秋葉雨中斑鄉

鍾廣漢云似蔣

鍾廣漢云似徐

鍾廣漢云似高

明詩總卷之十一
夢深宵斷琴聲永日閒遙憐和歌客相憶渺江關

鍾廣漢云似邊

庭實

湘江旅懷

北渚初涼夕蕭條兩岸風烟波連漢口雲樹出湘中碧
草王孫路黃陵帝子宮此時愁欲絕不待暮潮東

鍾廣漢云似何

仲默

衡嶽半山亭遠望

五嶺宗南嶽羣峰冠祝融路從山半合亭對海門空岫
嘯豐碑蝕瀟湘極浦通冷風如可御吾欲問鴻濛

鍾廣漢云似王

雅欽

題真空寺壁

真空寺後雙松樹曾見先皇駐蹕初三讓豈宜臨便殿
百年猶共識遺墟離筵慣聽悲歌續佛火偏存浩劫餘
高坐道人無恙在願聞第一義何如

馬任遠 一首

任遠字毅仲永年人萬曆己未進士除知葉縣
歷官戶部員外郎

抵蘇州

酒醒夢斷旅帆孤遠岸晴波戲浴鳧橋過橫塘聞犬吠
綠楊影裏是姑蘇

徐伯徵 一首

伯徵字孺臺海寧人萬曆己未進士除南陽推

官尋改教授升工部主事歷郎中出知揚州府
有資敬堂詩集

孤山

爲訪幽人跡乘茲暇日遊墓門無塑鶴山寺失安榴徑
愛烟霞夕屏開水墨秋要知白太傅到此也勾留

葉憲祖 一首

憲祖字美度餘姚人萬曆己未進士除新會知
縣考選左遷大理評事轉工部主事坐建魏璫
祠不肯督工削籍崇禎初起南京刑部郎中出
爲湖廣按察副使歷官廣西按察使

江行

杳靄中流二水分人傳此地弔湘君南天漸隱巴陵樹
西塞猶飛夢澤雲傍晚魚龍常涌沫隔江鳧鴈自呼羣
年來已覺風波慣枕上漁榔處處聞

陸懷玉 一首

懷玉字石含平湖人萬曆己未進士授工部主
事歷員外郎中出知鎮江府遷湖廣按察副使
轉參政山東按察使福建右布政使

也園

裡藥雲根已十年小園獨寤思悠然豈無幽徑通韋曲
亦有連山象輞川半砌苔衣清似水一池花石小于錢
歸來便是西疇長晚稻秋香滿社田

明詩綜卷六十二

小長蘆 朱彝尊 錄

桐鄉 金 樟 緝評

艾 穆 七首

穆字和甫一字純卿岳州平江人嘉靖中舉人
初仕為國子監助教萬曆初遷刑部主事歷員
外郎抗疏論張居正奪情廷杖遣戍西寧久之
起補光祿少卿轉鴻臚寺卿再轉太僕寺卿以
都察院右僉都御史巡撫四川有終太山人集

靜志居詩話艾公與吾鄉沈純甫先生同論江陵奪情其謫戍一西一
南艾公出都詩云病向西風一促裝寥寥征鴈塞雲長流沙萬里無愁
遠去國孤蹤信若狂楚客江魚身可葬漢臣馬革骨猶香青山到處皆
吾土豈必湘南是故鄉是亦達人之言西竄之後詩律頗效空同自公

而後南風
多死聲矣

聞有救獲赦不果

十年不向湘江返一疏翻為萬里行隴外儘令魑魅喜
日邊應有鳳皇鳴極知故態仍狂瞽須信天王自聖明
閒却綵衣誰為著塞雲邊月不勝情

甘泉塞上呈中丞侯公

青海灣頭調角聲賢王西牧欲橫行戎心縱款猶難測
斥埃無烽却不驚破膽爭傳司馬諭受降高築白狼城
腐儒未識麒麟画只道風塵易請纓

奉和岳州張兵備

握蘭虎署為郎日意氣相看獨有君擊節幾談天下事
建旄今領水犀軍幕中說劍雙龍動樓上停雲七澤分
秋色滿湖吟眺足銀魚何苦碧山焚

寄呈乾菴馬公拜相

繡裳蒼玉自丹霄風采今看表百僚帝謂山龍惟爾補
人期霖雨幾時調鳳池魚藻歡應合鴈塞狼烟燼盡消
流落扶風門下士玉關猶得比班超

別羅孝廉

江城傾蓋識清狂意氣翩然調更長歌罷竹枝空下里
賦成雲雨滿高唐蜀門秋盡啼猿急涪渚霜清白鴈翔
後夜思君出巫峽楚山巴月共蒼蒼

寄懷沈純甫戍金沙

衡陽那見鴈飛回
庾嶺梅花幾度開
謫後沈郎應更瘦
調同楚客不勝哀
金沙潮落珠光動
銅柱風清海月來
君在瘴鄉偏逸興
新詩能為故人裁

遼東大捷進橐駝志喜

年來渤海不揚波
忽聽遼陽奏凱歌
白羽飛傳三箭捷
赤囊馳獻獨峰駝
將軍絕勝嫖姚勇
良馬何論大宛多
此日天聲應萬里
合標銅柱白狼河

瞿汝稷 一首

汝稷字元立嘗熟人景淳子承父蔭由五府屬
歷郎署知黃州邵武辰州三府遷長蘆都轉運
使加太僕少卿致仕有問卿集

曹能始云問卿詩沿選體律絕步超唐人斐然

送僧游五臺

欲叩三車奧還過五髻西
飛雲先錫住怖鴿覓燈棲
金閣看長在珠林望不迷
天花開處處知與石牀齊

屠本峻 一首

本峻字田叔鄞人尚書大山子承蔭官太嘗寺
典簿歷南禮部郎中出為兩淮運司同知移福
建運使有屠田叔詩草

詩話田叔好詼諧詩多不拘格律晚節歸田愛客益甚盃盤蒜果觴客必盡歡守辰州日禁民殺牛有唐生牒言家貧畜一牛不幸死請鬻其肉田叔度其偽也判以俸錢買牛葬之牽至乃生牛因命小吏飯之及解官衣深衣騎馬出門州父老泣相送牽牛隨其後時人為作辰陽留犢圖年既老好學不倦或曰先生老矣奚自苦為荅曰吾於書飢以當食渴以當飲欠伸以當枕席愁寂以當鼓吹未嘗苦也因自稱憨先生

燕歌行

亦曰燕叟起生曠于甬上撰狀及表年八十餘乃卒至今甬東言風流儒雅輒首及之

登君罍罍藻井之堂坐君龍鬚琥珀之牀贈君五明七寶之扇酌君紫霞碧玉之漿烹鮮擊肥召吾客秦箏趙瑟鳴我旁世上浮名亦徒爾安有五侯七貴能文章勸君無言舌且藏

毛以燧 二首

以燧字允奎吳江人萬曆中舉於鄉歷官慶遠知府進按察副使致仕有審雨齋詩藁

邨居

丘壑偏宜謝幼輿清泉碧篠愛吾廬祇知幽絕堪高枕未解窮愁好著書閒過山僧煮笋蕨倦從野老課菑畬夕陽流水荆扉靜花滿清尊月滿裾

山陰王伯良久滯京師却寄

蛾眉十樣逐時新不是東鄰亦效顰况是浣紗溪上客那能不憶浣紗人

吳詔相 一首

詔相字廷承宣城人由舉人萬曆初知汝州有

吳汝州集

詩話臨川湯養仍為廷承作傳述其生而不慧既就塾日記千言縣試令訝其幼謂曰童子豈外黃兒邪應聲答曰明府比中年令矣令竦然異之廷承嘗夢紫衣人指點一閣道中松柏蔥青數里及知汝州果有閣道松林中歎曰命止此邪因慵於治事未秩滿稱病瘖去歸見其母抱持大哭失聲疾遂愈丁母憂未終喪而卒存詩雖無幾年編續宛雅者竟遺之惜也

同張侍御有光汎舟分韻

桂權連朝發松雲卓午陰涼風轉蕭瑟細雨潤衣襟歌
酒狂無奈耕畬思更深晚來餘興在不厭再相尋

費懋謙 一首

懋謙字民益鉛山人襲蔭官南京都察院經歷

詩話民益履屐子弟綽有詩名兼善山水梅竹
青溪社集實首倡之相逢一篇源出蘇欽楊方

相逢行別吳中四子

與君相逢處乃在青溪濱何意溪頭柳能令傷客神與
君相逢處乃在邀笛閣何意笛中曲能令心不樂與君
相逢處乃在射堂上何意堂前月勞勞生夢想與君相
逢處乃在冶城宮何意冶中劍飛躍各西東我昔承清

盼君亦憐我姿願以朱絲絃報君青桐枝終日不成縷
對君空自持願以江干菼報君蘭蕙芳終日不成芻對
君空自將願以青玉盃報君金琅玕終日不成琢對君
倚長歎願以錦繡段報君貂襜褕終日不成章對君長
煩紆贈君愛流晷我亦慎區區所貴各努力聚散誰能
無中情既款款徙倚亦何須古人皓首言君諒我不殊

王敬臣 三首

敬臣字以道長洲人參政庭子講學於吳以薦
授國子監博士學者稱少湖先生有俟後編附

詩

詩話博士講學不立異同以躬行為本
詩其餘事務去擊壤陳言更難得也

古詩送陳憲副雨泉之任滇南

黃鵠翔四海潛蚪樂泥蟠飛沉各異塗言就性所安公
行越萬里予留守故灘公勵王尊節九折驅無難予舍
令伯誠有懷良未殫俱奮古人心咸思效寸丹臨岐申
贈言睽離何足歎相期慎明德歲晚同金蘭

感興 二首

河伯侈秋水囂囂自矜誇一聞海若言頽然喪其多覆
載會有終百年能幾何營營靡朝夕所得皆塵沙哀哉
復哀哉是不可已邪

月圓還復缺缺矣又重圓圓缺相倚伏造化良自然萬
事皆如此孰能測其端君子通大道曠然釋嬰纏寸心

良已罄付之蒼旻天

莫是龍 六首

是龍字雲卿以字行更字廷韓松江華亭人如

忠子以諸生久次貢入國學有莫廷韓遺橐唐君

公云廷韓夙成捷悟
不屑為沉深之思

詩話廷韓少謁王道思於閩道思贈以詩云兩舫夜吟令客
駐練裘書卧有人書然詩篇書法皆不見出羣五律稍勝

登潤州城樓

高閣俯城陰松篁一徑深晴雲搖海色夕梵起潮音古
戍關門斷山程驛道侵江流無日夜南望是鄉心

過滕縣

邑傳滕子舊爵序薛侯先壤地雖褊小君臣自井田禮

明詩總卷六十三
猶宗國秉館想上宮連遺恨千年事何勞授楚塵

送俞生之金陵

驅馬向斜日秣陵尋舊游人應草堂在月滿大江流春
燕投新社離鴻失故洲看君留別意不減落花愁

送陸生遊燕

小陸江東俊名先入洛聞猶能藉知己未可怨離羣燕
地春邊雪吳天野外雲翩翩徒羨爾西笑立斜曛

宿河口酒家

笑指停橈處烟荒一水斜邨旗招野客岸火認漁家淡
月微侵幕初潮淺映沙海天應不遠吾欲訪靈槎

贈任城故知

此別何疎闊風烟宛昔游馬頭芳草路柳外木蘭舟易
隔三年夢難期十日留任城今夜月閒殺酒人樓

鄔佐卿一首

佐卿字汝翼丹徒人有纏頭集

錢受之云公子富於才
調豔詩自義山之後不

多見也

西津別妓

立馬江皋問暮潮片帆西上路迢迢人歸碧草離亭遠
賦罷青山夢雨消雲影飄零桃葉渡月華淒斷鳳皇簫
壚頭濁酒春堪醉還訪秦淮舊板橋

甯祖武二首

祖武字仲先吳江人以貢生官肇慶通判有迂

公詩草

詩話別駕未晚投簪娛情泉石預營繭室自為之銘號曰迂丘嘗欲買木版以覆塵几思送死棺所必需匠人告以元日往購則木商不計值且有酒果相邀別駕遂以是日就肆飲酒醅果而回鋸木以覆几焉題詩云元日治凶具人情良獨難生以覆几塵死伴歸空山是亦達人之高致矣別駕詩多率易錄其二首知非真行者

新安夜泊

芳草綠如此征塗尚未窮
隔江商店火近市酒旗風
人語邨邨異溪聲處處同
不須愁落魄人世總飄蓬

吳江竹枝詞

唐家坊藕太湖瓜消暑冰肌透
碧紗水上納涼何處好
垂虹亭子看荷花

陶允嘉 三首

允嘉字幼美會稽人承父大順廢官鳳陽通判
有澤農吟

詩話幼美體弱然無塵空之氣符離懷古一篇惜不令淳熙諸君子見之

廣陵詞

桃花新雨後載月出邗溝
棗板江南曲筠簾擗子舟
飛雙燕子何處覓迷樓

符離懷古

張都護殺曲端關中將士皆心寒
秦丞相殺岳飛萬里
長城一旦隳婁室歡顏兀兀喜
小朝廷復何恃長脚太
師吾何尤魏公九原知悔不

高邨謁漢高皇廟

高郵湯沐地下馬獨徘徊落日吹原廟歌風想舊臺新
豐雞犬去故土夢魂來猛士空煩憶韓彭安在哉

黃繼立 一首

繼立字志學江陰人貢入太學官中書舍人

初夏

楊花初點渡頭萍十姊妹花紅滿屏門前忽見漁舟過
風送鷓鴣一陣腥

任山甫 一首

山甫字夢榛休寧人自號五安山人承天府經歷遷德安通判

和費民益韻

萬里事行役經年往復還愁多生白髮病久改朱顏不
厭沽新釀長思返舊山因君歎留滯牕外雨潺潺

襲 勗 一首

勗字懋卿章丘人以歲貢生官江都訓導轉威
縣教諭再遷開平衛教授有襲懋卿集

詩話懋卿少貧牧羊豕山中手書卷不釋既而小吏誣其逋租受笞益
發憤力學見李中麓以詞曲名恥之銳意學古文辭時稱為醇謹君子

立秋

烟雲黯慘仲宣樓荏苒年華逝水流白首鄉山千里外
滿城風雨又新秋

黃 時 二首

時休寧人縣丞有順堂集

白螺山吳大帝廟

螺山何嵯峨荆江走其下上有紫髯祠祈報滿邨社自昔割據時炎劉失區夏聿求土宇寧遑恤名號假巴蜀徵讖符許洛盛戎馬於焉割朱方鼎立足相亞虎既負其隅龍乃戰于野哀哉爾汝歌誰永霸圖者來游陳我辭渚蘋薦盈把

孟嘗君養士處

官橋垂柳娘闌千古薛遺墟駐馬看食客三千容易散至今惟說一馮驩

李德繼一首

德繼字子同鄞縣人由太學生選授光祿署丞

有借樹齋集

懷包參軍

極目西來山色秋但聞長笛不勝愁故人家在清江上潮滿門前月滿樓

劉成美一首

成美字大卿漢陽人萬曆中舉於鄉由河源知縣歷官蘇州府同知有閒閒草

南還道中

春去花齊落人歸路轉賒峰陰昏霧合樹影夕陽斜溪隔循紆徑橋危度淺沙停驂聊對酒醉處即為家

卜洪勳一首

明詩宗卷六十一

勳字世甫嘉善人司勳錫子官東鄉主簿有石居集

歲暮述懷

戶外塵非隔庭前草不除
技方慚画虎賦已就枯魚燈
影隨風蕩鐘聲帶雨疎
半生無別嗜惟讀父遺書

田藝衡 一首

藝衡字子秬錢唐人汝成子以歲貢為休寧教諭有留青日札

月夜即席示座客

雲散江城玉漏遙月華浮動可憐宵
停歌不飲君何待試問當年李玉簫

自注玉簫蜀宮人愛唱王衍宮詞月華如水浸宮殿有酒不醉真癡人之句

謝三秀 十三首

三秀字君采貴竹人萬曆間學官有雪鴻集

李本

寧云君采詩觸境生情緣情體物格整而不滯氣雄而不亢旨深而不晦致清而不薄辭麗而不浮此治世遺音也 陳伯璣云君采造語運成即偶入纖詞不失大雅

詩話君采詩甚清穩由其生於天末習染全無此黔人之軼倫超羣者

城南江亭

旦發虹梁門暝投漁磯
路春水半篙綠褰裳不可渡
溪深烟復深遙遙辨庭樹

晚汎蕭湖尋宋人虞仲房石壁

川光鬱初霽野航恰受客
天空斷鴈哀水落寒沙積
絕峽響飛泉飄飄足練白
涼葉不禁霜楓林還槭槭
輟櫂

明言經卷六十二
湖之陰突兀見瑤碧恍疑太始雪拔地起百尺登眺極
人目了了晰阡陌胡為水窮處乃有此奇石昔聞避地
者於焉卜其宅愛茲雲木秀重以巖潭僻靡旦匪蘭橈
或時仍柘屐遺詠蝕苔紋風流已陳迹高躅杳難攀我
來徒惋惜商飈增暮寒旨酒若為適興盡鼓柁歸滄浪
黯將夕

蠻娃曲

蠻娃出戶筠筐隨琇子穿環帕裹頤東鄰女伴競相逐
四月深山采葛時葛葉萋萋葛藤綠按葛為絲給春服
經絲易脆緯絲柔裂指猶嫌繅不速破牕風急寒炆生
流黃軋軋無停聲織成未敢問刀尺明日輸租應到城

到城杼軸歸公府吁嗟蠻娃亦良苦君不見北里春風
歌舞人曲罷羅裳棄如土

湯陰道上見楊花如絲戲作

古道多垂楊春殘花亦白毵毵隨晚風到地忽盈尺中
原凋敝民力微安得吹上流黃機若教織作機中素九
月何人不授衣

安莊夜聞警

鼙鼓中宵急愁聞戰伐頻數家出煨燼一郡入荆榛地
亂難為客塗窮恥傷人披衣待明發華髮鏡中新

邨行即事

十里荒邨路尋幽到薜蘿陂寒菰葉少籬晚豆花多廢

明詩紀卷六十一
寺紛蟲網負家靜雀羅老翁晞髮坐相對說兵戈

送吳使君攝八番郡事

才子漂零久今看治郡功地當三楚盡山到八番雄詞
賦霜毫裏桑麻露冕中孤城饒吏隱解帶聽松風

夜集薛葵軒明府西巖

曲磴穿叢篠風烟憶武陵飲能齊阮籍嘯或似孫登投
轄留山客呼船送嶽僧江城無埃火薄暮見漁燈

焦溪雨渡

遠岸平蕪綠寒流似若邪雨深人喚渡春老客思家野
葛牽青蔓溪藤落紫花浮名是何物漂泊又天涯

辰陽晚泊

春流似建瓴春色晚冥冥溪菜盤餐滑江魚匕箸腥月
來沙漸白烟斂樹猶青漁父方舟處聞歌媿獨醒

洞庭夜泊石門對月

平湖涵霽景涼月漾晴暉樹極長天盡雲歸別島微燈
前秋社燕夢裏故山薇誰念滄洲客飄零未授衣

西菴徑中萬竹翛然喜而賦此

負杖入深竹一盤仍一盤鄰僧分路去野客到門看不
雨夜尤綠無風夏亦寒素琴多遠思宜對此君彈

題趙文度画西溪梅花

欲雪不雪天淒淒南枝北枝開漸齊因訪梅花過橋去
始知春在西溪西

王象艮

二首

象艮字思止濟南新城人仕為姚安府同知有

迂園詩集

董思白云思止風華秀絕骨力沉鬱錯出大曆長慶之間公考與云思止春容淹雅白真韋澹自然神合

豫讓橋

義士負奇節所重在知己讓也慷慨流恩仇惟一匕將以酬智伯勢必危襄子一往志不返肯以彼易此所重者一言所輕者一死荒橋至今在過者猶興起立馬對斜陽湯湯聽汾水

雨中登鹿角山宿趙荆石宅

厓古憑空閣峻增石徑斑龍源花外水鹿角雨中山辛有心知共兼逢地主閒登臨無限意信宿不知還

徐

成一首

成字竟之金華人仕為鎮國將軍

洞庭謁湘君廟

帝輦南巡竟不還亂雲愁絕九疑山空憐湘水通三楚遙想蒼梧近百蠻墮淚有痕留竹上落花無夢返人間千秋哀怨存遺廟悵望蘭旌不可攀

吳稼澄

七首

稼澄字翁晉孝豐人維嶽子以例除南光祿典

簿累遷雲南通判有玄蓋副草又北征南諧滇

游諸臺

詩話翁晉樂府如健兒騎駿馬左右馳突磨不如意近體頗合西崑歸自滇南里居極絲竹雲林之趣自號大滌先生病革語其子以布衣幅

中敘謂如此庶足以見疇昔詩
人於地下蓋以貲郎自懲云

礦山謠

朝采金暮采金草枯山根裂居民淚沾襟信信之犬昔
以吠夜今以給傳舍喔喔之雞昔以司晨今以飽游民
水衡積錢爛如土何不詔取中官歸御府

牆頭草

牆頭草秋零春復抽胡不生彼庭中生牆頭庭中無不
可惡木枝蔭我又豈無野田媵農夫二三月荷鋤將見
凌牆上趨難為階託根高固其荻牛羊欲食不得食牧
豎過之徒歎息

歲晏偶成

歲云暮矣風淒然豆萁零落南山田陳篁掩映半庭雪
獨鳥棲息中林烟溪上老翁索魚價壚頭女兒催酒錢
衡門暫啓一失笑復有僧雛來募緣

秋懷 二首

金荆為枕紫荊牀已共秋塵委曲房燈下有情啼絡緯
機中無夢到鴛鴦明星爛爛愁天老爝火離離歎夜長
一樹桐花零落盡可憐梧子自經霜

重扃落葉迴相依羅袂無聲事已非寶鏡欲開鸞自泣
玉釵初斷燕猶飛旅葵未合生空井苦檠真堪染故衣
滿目清秋何所似白雲愁色遠微微

社日過山莊

背依叢竹面清溪茅屋蕭疎類灑西兒子社錢無用覓
田家秋釀且相攜梁間已去將雛燕階下新行傍母雞
一束荆薪兼蘊火不愁山路夜歸迷

金陵酒肆贈茅平仲

暮年看爾壯心孤落落酣歌擊唾壺但數一錢憐姹女
纔誇千騎笑羅敷梨花雨濕紅襟燕楊柳春藏白項烏
欲向盧家借雙漿莫愁不是舊時湖

薛文炳 二首

文炳字有孚嘉興人鴻臚署丞有調疴集

江城登望

三月清明近風光動客愁葉齊江柳暗雲暝石塘幽戰
伐悲新鬼登臨憶故丘南湖春欲暮羈思羨鳧鷗

閒居雜興

最愛江南小滿天櫻桃爛熟海魚鮮一聲布穀啼殘雨
松影半簾山日懸

王同軌 一首

同軌字行父黃岡人以貢生知江寧縣

錢受之云
行父作詩

不多自具風格不欲寄諸公籬下撰前
後耳談纂述異聞亦洪氏夷堅之流也

行山中

雨餘林氣靜山晚日光斜野店依孤樹邨橋卧斷槎馬
嘶遙澗水犬吠隔林花白首鉏雲者春風自一家

華善繼 三首

善繼字孟達無錫人仕為浙江布政司都事遷
永昌通判有折腰漫草

詩話孟達詩不及其弟

舟中述懷

高城片雨外倚櫂亂蟬鳴遠樹他鄉色浮雲過客情泉
甘知早竭木散得長生悔逐時人後空將骨肉輕

雨後

高樹留殘雨層城帶晚烟厨香菰米熟架滿豆花鮮未
改狂奴態還為長吏憐不因公事暇那賦白雲篇

春盡

即看春欲盡漸覺客衣輕燕以飛蟲下魚因落絮驚看

雲忘拙宦對雨憶躬耕最愛新移竹清風葉葉生

華善述 十六首

善述字仲達無錫布衣有被褐先生詩藁

王元美云仲達

詩翩翩霞舉或艱或易忽沉忽揚瑕瑜互見大槩不可為詩話仲達與兄善繼孟達並有才名王元美列其兄於四十子之列而仲達不與焉觀其詩品矜奇灑落幾欲御風而行一時詞客未或過之而元美序之謂不可為典要是亦拘牽之論已

長相思

長相思相思長幾許黃河三三曲曲通牛渚巫山六
六峰峰度神女枯槎不來雲不雨夢落風波安可語

休洗紅

休洗紅洗紅紅可惜初洗猶作黃再洗漸成白紅芳既

去質亦移雖有茜草將安施

海樓篇

上客且歸休我歌送行舟君家近東海海中有瀛洲瀛洲不可見但見金銀樓此樓誰爲之無乃蜃氣浮相望邈無梁引領成悲愁

濠梁篇

濠水清若虛儵魚此中居儵魚何所樂水闊忘响濡莊惠去已久懷古思有餘子是梁上人非魚諒知魚

雜詩

白髮白更長白花白更香春風一相見歲月久難忘君耕石田熟余亦起羣羊

山中作

達士貴薄游幽人安坦步耿耿悟月初蕭蕭竹風暮握蘭青厓陰采蘋寒水渡荷衣秋始製何用畏多露

答錢化臣

玄蟬餐清風長日鳴茂林蟋蟀飲繁露永夜莎根吟二蟲夫何知聽者多苦心絃桐與無絃視之誰非琴曰余室湖渚開口當遙岑旣無簪組累又鮮轅馬臨終歲足暇豫長謠散幽襟偶爲好事傳詎取時名侵媿君錫嘉譽撫已安可任

重送世叔

清樽可續沽孤舟且緩發款款垂別語皎皎初圓月幸

自合一心無令歎華髮

庭草作花有感

中庭無嘉植青碧翳芳草秋至花亂開翠色亦自好
既不藉漑灌復無採摘擾無名且無種生意可常保

今夕行

今夕何夕露爲霜湖中之水寒且蒼明月倒落水中央
溯游從之葭莢香雲山層層思難忘我有故人隔他方
三年不歸松菊荒誰謂河廣一葦杭爾獨胡爲勞我腸

湖中之水歌

湖中之水常東流眼前無事不可愁貴如博陸死夷族
富如衛尉生斷頭勳如淮陰竟菹醢親如文信俄仇讎
唯有文章稱不朽高名往往垂千秋試尋名下人安在
左馬屈宋空土丘不朽者文朽者骨寸心枉作蛛絲抽
自古多才更多累我獨何爲生煩憂

招隱吟和伯氏

招隱吟寒山蒼蒼日欲沉風來萬木皆蕭森飛泉激石
流清音聽之如玉復如金須臾月出罔兩侵猿鳴後林
鶴前林青松白露光淫淫珠璣墮地不可尋有美一人
薜荔襟橫陳古昔三尺琴一指未下意已深廣陵之散
愁人心抵節高歌招隱吟

蟠桃思

蟠桃開花予共汝十日瑤池白雲語蟠桃結子汝棄予

萬里澤國紅塵居等閒便擲三千歲相憶那無一字書
旅懷

萬里秋將盡孤舟夜未殘獨愁成淚易清夢欲歸難鴈
落繁霜白鷗飛片月寒朝來行客鬢映水默相看

晚秋鄒靈壽見過

野田猶汎濫籬落亦荒蕪啓戶聞鳴鵲停舟散浴鳧愁
來說鴻寶酒後憶雕胡君定知朝事今年可賜租

寫懷

薄俗空相苦寒泉只自甘鶴應知夜半狙不喜朝三北
斗懸牕北南山橫舍南從教斷來往端坐待鸞駮

梅守箕九首

守箕字季豹宣城縣學生有居諸前後集

詩話梅氏一門羣從禹金最負時名嘗後先過王元美元美贈之詩云
從誇荆地人人玉不及梅家樹樹花季豹為禹金從父譽雖稍遜禹金
然詠懷諸作恐小
阮亦當避席也

招隱曲寄吳允兆

勝游不擇塗山棲不避幽魚鳥有本性何以異沉浮昔
者東方生金門可優游亦有嚴君平足跡謝帝州真情
愛松桂同器忌薰蕕輪轂淹泥淖樽俎潛戈矛流塵眩
目光魑魅走道周舍旃盍言旋春草盈芳洲

詠懷三首

飛閣臨馳道樞軒俯四隅遠望可當歸何以心不娛夾
巷叢灌莽第宅成丘墟魑魅嘯中林夜啼猿與鳥密親

田言經卷之三
不我與我友不我俱拊劔明所懷託情於素書
愛極翻自疑驩極易以悲所以樂莫樂固在新相知皎
皎中天月虧盈尚有時惠思念疇昔怛無好懷歲暮
空堂上明星照我扉身各天一隅安知渴與飢慰我同
心人膠漆未可期
索處無適懷羣居興怨尤素交夙已盡闐闐起相仇甘
醴善逆人終始寧爲謀同心託蕭艾一器戒薰蕕匿怨
而友人見鄙於左丘信哉朱穆言獲我心所求

雜感

獨坐不能寐振衣將遠行悲風自南來吹我襟與荆河
水何泱泱中有好鳥鳴我欲往從之惜哉已徂征白日

難少留年歲忽已傾願借明月暉流光燭我形

古詩 二首

日月易流邁哀榮曾何期霜霰忽來集衆芳忽已辭物
象貴其新故心誰當持懷念如夙昔中情苦不怡人生
一世間離合亦有時超忽即變化展轉焉可知

郭東亦有墳郭西亦有墳登城一以望纍纍正相因狐
兔穿爲巢魑魅託爲鄰潛燐不自照幽路何由伸陰風
卷秋草日莫常悲辛

送吳允兆

秋氣何寥凜廓處羈旅間淹留蹇無成惆悵私自憐駕
車出行游願從吾所驩所驩良已篤情好若蕙蘭素風

飄廣路枝葉忽以殘結誠殊匪薄永久思弗讐敘意衷
所期令德思勉旃

贈祁羨仲 有序

羨仲俠士能訕仲好奇策少游豫章乏食即行

乞市中

客游小四海不裏千里糧城中乞食已忽醉胡姬旁縱
橫狹路間褐夫視侯王吁嗟不逢時蓬累職所當

梅鼎祚 七首

鼎祚字禹金宣城人國子監生有鹿裘石室集

歐楨伯云禹金五言古蒼然骨立七言馳驟樂府時極杜陵之致近體
氣純而完聲鏗以平思麗而雅 王仲房云禹金詩確守風格乖僻不
生奇宕時作 沈君典云梅叔子天才駿發詩如王子晉來緱嶺清吹
泠然 錢受之云禹金詩雖游獵漢魏三唐終不出近代風調秋滅葉

聲中五字擅長錦千
篇萬句亦何以加
詩話禹金周見洽聞著書甚富詩乘文紀之外旁及書記小說兼精傳
奇所填韓君平玉合記為詞家所賞有云風中絮陌上塵歎韶光何曾
戀人亡友王
介人極稱之

雜詩

智愚無常稱妍蚩無定容名德貴易立顰笑賤難工登
高疾赴響所處固已崇流俗快目前安得察其終

雜感

忽忽中不擇駕言陟高丘高丘臨四野湛湛長江流豈
不懷所歡欲濟無輕舟佳期曠何許歲月倏已邁蹟往
既非故撫來難豫謀俛仰千秋間涕下不能收

雜懷

鷓鴣屬其羽玄鳥歸故鄉日夕涼森發大火戢朱光陰
氣馴以至草木率焜黃九六代爲窮龍戰血縱橫堅冰
自有時聖人戒履霜

哭麻鴻臚

驚風下平楚白日歸虞淵彼此相代謝時至有固然所
以上知士往往不待年比歲在龍蛇汝命竟不延詎意
黃公壚倏忽成河山逝水豈顧反行雲何當還形神曠
不接而况尋笑言先後等斯須喟焉摧心肝

金陵寄王仲房

宛水一爲別金陵再寄書王家桃葉渡秋日柳條疎客
久少知己吾將歸弊廬向君尋舊約百里共樵漁

金陵客懷

乙酉暮秋作

恣意游能數多懷望轉迷清秋雙闕外佳氣二陵西鴈
已先霜下烏仍近夜啼都亭酒太惡不得醉如泥

九月八日城東樓晚眺寄史使君姑孰

落葉來鴻秋可憐孤城晚眺正蒼然向傳李白題詩處
重見玄暉在郡年霜後鳴磬千戶月風前哀笛一江烟
倚闌却憶龍山會誰共黃花插酒邊

梅蕃祚

一首

蕃祚字子馬宣城人鼎祚從弟官寧鄉主簿有

涉江草王程草

詩話子馬與季豹禹金同負詩名王元美詩較他
羣從更高華蓋指子馬言也然非季父賢兄之比

重過道南叔山居

谷口子真宅松蘿境自偏當牕懸衆壑隔樹見飛泉送
客柴門下尋僧野寺邊時時來取醉人道竹林賢

汪道貫 三首

道貫字仲淹休寧人道昆弟有汪仲淹集

李本寧云仲淹

詩頡頏其兄才情節
奏出入陶韋王孟間

贈鄧孝孺

聞汝幽棲處澄湖一片明青衿生事拙白髮著書成澤
國堪高卧山田足耦耕華陽仙路近千古傷茅盈
鄉榜被放作

得路難如此飄零似去年曉風池上月秋水鏡中天

咄悲生事勞勞問酒錢啼猿與征鴈總使淚漣然

題扇

落日照前溪倒影映紅樹幽人不出山白雲自來去

汪道會 一首

道會字仲嘉休寧人亦道昆弟諸生有小山樓

橐

李本寧云仲嘉秀
色天然盡去雕飾

過王百穀

秣陵三月柳含烟猶憶城南送酒錢雙槳暮潮桃葉渡
一尊寒食杏花天江門隔歲書相問吳苑今宵月再圓
執手莫須論往事傷心近廢鶴鴿篇

劉潤 一首

潤字德祖歙縣人有鶴嶼集

寄王仲房

不見風流王右軍詩名湖海日相聞
歸期漫阻黃梅雨鄉思遙懸白岳雲
千里音書秋後斷一江南北夢中分
潭園草罷閒居賦誰共清尊醉夕醺

劉 澳一首

澳字本瞻潤弟

九日同葉茂長汪和叔登高燕集

九日他鄉菊未開相逢同上竹西臺
江南木落千峰出薊北風高一鴈回
笑指青山懷杖履羞看白髮會歸來
明年此日難同賞烟雨何妨數舉杯

吳元樂 三首

元樂字振之休寧人

春日有懷仲仁

獨行墟落間舊徑生芳草一見蝴蝶飛
三歎青春好故人不可同能無傷遠道

八月十二夜作

暝鐘初定後秋氣漸深時顧此蒼苔上
泠然白露滋蛩還依砌響月自隔林移
不見素心者空懷夙昔期

湖上憶別

河橋三月水平津兩岸輕波漾綠蘋
曾向此中傷遠別故人今隔幾回春

產科一首

科字 望江人由貢生萬曆中知通江縣事

茗山洞

羅隱曾隱此山有蓮花峰相傳仙人嘗憩其頂

峰陰迴合擁青蓮詞客遺蹤尚儼然啼鳥故疑歌白雪
飛泉猶似奏朱絃林扉蕭瑟無塵躅石室逢迎有洞仙
安得向平婚嫁畢拂衣吾亦弄雲烟

明詩綜卷六十二

明詩綜卷六十三

小長蘆 朱彝尊 錄

桐鄉 金 栻 緝評

宋登春 三首

登春字應元新河人有鵝池生集

靜志居詩話王喬之玉棺桓司馬之石椁可以謚曰至愚然而楊王孫之僇葬劉伯倫之荷鍤便埋亦矯枉之過也鵝池生語邢子愿云君視宋登春豈杉柏四周中人行將浮錢塘脫履江干乘潮解去既而果躍入江魚腹之葬果勝於一棺之土乎君子譏其誕矣生詩平淡寡深思不失為賈浪仙

李才江一流

薊門

桑柘兵殘後人家夕照中天秋沙鴈沒月冷戍樓空
將燕山北擒生遼海東城南餘戰地燐火夜深紅

九月三日方別駕攜酒殺見過因懷徐荊州

客淚秋能下人情老自知塞寒鴻鴈早江暖菊花遲對酒憐吳語聞歌憶楚辭明年誰更健重把紫萸枝

秋日野望

聽鳥中林性看雲故國心地卑湘漢闊天遠洞庭深老馬空知道窮猿豈擇林十年書劍客寂寞到如今

陳昂 三首

昂字雲仲莆田人有白雲先生集

詩話山人以伎亂率妻子奔豫章織草履易粟不給則賣卜已而入楚蜀轉客金陵間賣文為活既窮以死其自序略云昂於詩尤嗜五言第家貧無書誦王右丞作即師右丞誦杜工部作即師工部可謂多師以為師者也

宿江邊閣

暝色江邊閣行吟易斷魂風前兩岸葉月下一聲猿夜哭誰家婦寒號何處邨洞庭春水動雇艇去荆門

閩南登樓

切莫登樓望令人更慘淒戰場多鬼哭息壤聚烏啼黃霧埋城郭寒風死鼓鼙深樓巢燕子來往亦銜泥

移居巴陵

此即巴丘戌相傳魯肅城古今餘往事兵火剩殘生楚水為漁便湘山結室平地靈如獲託亦足寄遐情

馮遷 七首

遷字子喬上海人有長鈇齋豪

潘子仁云子喬采掇菁英鋪張平實吾見其進

未見其止也 朱邦憲云子喬緣情定體因體鑄辭雄麗雅澹之言皆備

詩話子喬詩出辭似淺而鍊
格頗道洵之汰之沙礫自去

與俞仲蔚

仲蔚青雲姿偃蹇山澤間遺棄當世事賦詩獨精專大
雅既寂寞下接蘇李肩晨昏弄筆札几席生雲烟流傳
翰墨林字字堪磨鐫相過遇佳夕春風盎和顏燃燈設
清醴微奧相與宣高懷曠千載鬱鬱忘冥筮所嗟歲云
暮何以奉周旋

病卧十日城中米價騰踊感而賦此

兒童負裹朝出市日暮歸來哭不止斗米新騰價百錢
布匹雖行賤如水盡言久旱江水枯賈舶商船難到此
城南早稻秀不實城北晚禾乾又死悲哉野老啼無聲

十日病卧茅屋裏

送唐世其北上

君去青山外予吟綠水邊忘機鷗性狎快意馬蹄穿魏
闕通霄漢吳臺思管絃遙知聽雨夜定憶小樓眠

潘伯明邀飲朝天宮

邀我來仙界林深引玉笙坐來黃鶴舞醉倚白雲生江
作千年塹山圍六代城興亡易悲感何地訪初成

荆溪夜泊

細雨延春酌寒雲濕暮鐘客舟依樹小野火隔溪重風
水期無定登臨興轉濃明朝買雙屐共爾躡羣峰

復餞顧內翰於南浦因經曹公戰壘

映竹船牕水氣涼
渚風微泛白蘋香
今朝相送即相別
明日故人非故鄉
蔓草女牆橫斷靄
荻花軍壘護斜陽
銀河舊與滄波接
一望靈源萬里長

葉之芳

五首

之芳字茂長無錫人有雪樵集

寒食金陵病中作

東風吹短褐寒食傷天涯
客舍孤城雨鄉心二月花
遠山青極浦芳草綠平沙
不盡王孫淚年年感物華

靈江舟中

赤城東去水滌洄無數
寒花夾岸開越國青山臨海盡
靈江秋雨挂帆來舟中客淚隨
楓落天外鄉心逐鴈哀
如此蕭條須盡醉已知淪落不言才

送韓漢章自楚還蜀

河梁日暮罷離尊
送爾西游入故園
湘渚月明春飲馬
巴江花落夜聞猿
青山易墮天涯淚
芳草空消客路魂
何事不歸嘗寄食
道傍誰解惜王孫

題江邊柳

楊子津邊柳秋風葉乍凋
生當離別後不得長長條

入新安

可怪新安水舟從石上行
千尋猶見底不數越江清

柳應芳

三首

應芳字陳父海門人有柳陳父集

姚園客云柳詩如田舍翁暴作

封君舉止生澀 錢受之云廣陵詩人推陸無從然結染七子
流風不克自拔陳父名雖不及與會清發自可使無從却步
詩話陳父僑居金陵之杏花邨每出行吟俛首沉思觸人肩面不自覺
語所知曰作一詩必離魂數番乃得稱意昔人所云撫斷數莖並用破
一身心不過是矣其詩頗
選高格第去七子仍未遠

送周京兆建言再謫代州判官

向託湘流弔屈原十年岐路不堪論到來京兆纔三宿
謫去承明只一言馬邑秋高邊月近鴈門春盡塞花繁
再投萬死風霜地猶感全生聖主恩

初聞倭警有感

東倭海外播風烟回首扶桑氣祲連白羽插書傳幕府
黃金刻印拜樓船朝廷欲問來王日父老曾經又寇年
辛苦折衝胡少保永陵一詔至今憐

春閨

黃鶯不隻啼紫燕還雙栖栖在妾梁上啼向妾牕西

安紹芳 七首

紹芳字茂卿無錫人國子監生有西林集

葉茂長云茂卿

學瞻才高生不得志有浮雲當世之志厭栖鄉曲慷慨遠遊興至為詩
調高辭秀迴拔時流 俞羨長云茂卿詩不追逐時好搦管抽思一以

清婉

為尚

山中夜坐

夜氣何蕭森空山思寥廓不知風露寒彌覺衣裳薄美
人渺難期對酒不成酌白日虛牖生微聞桂花落

旅泊

秋盡仍為客江寒獨繫舟微霜下木葉遠火露蘋洲無

那風前鴈偏生枕上愁孤帆明更發何處復淹留

送曾中丞入蜀

玉節遙看萬里行鳴笳吹角動西京天邊劔閣雲連棧
樹裏巴江錦作城檄到百蠻新喻蜀圖開八陣舊藏兵
寨帷父老煩相問辭賦何人似長卿

花津

水上春霞明花開幾千樹不是避秦人人疑避秦處

一葦渡

夕陽下前溪西風吹野渡不見折葦人獨立滄江暮

春盡日寄華公衡

惆悵春風暮懷人興轉孤夕陽空極目芳草隔南湖

柳枝詞

赤欄橋畔柳絲長帶雨和烟總斷腸肯向西風恨搖落
願留春色待蕭郎

聞龍三首

龍字隱鱗鄞縣人處士有行藥吟幽貞廬詩集

屠田叔云隱鱗詩如溪上人家曲几疎牕長與水
雲弄色 王右仲云隱鱗詩清和穩暢卓然成家
詩話隱鱗為冢宰莊簡公孫以孝友德行聞於鄉里
初不以韻語自負然其近體頗間整特少警拔耳

山居即事

積雨朝來歇諸溪盡急流隔河看飲犢倚檻有浮鷗雲
冷松根石風微竹外樓蕭然無一事開徑遲羊求

送趙彥忠游吳興

吳興舊游地遠想尚依依
荻岸青簾舫桑林白版扉
計程千里近屈指一年違
從此斜陽外看山悵獨歸
聞吳少君病而阿霽死悵然懷之

來往家無定饑荒病未蘇
路危僮僕盡身老子孫無何
日忘機事全生付酒壚
榮期自有樂不用哭窮塗

譚清海一首

清海字永明東莞人有靈洲詩草

詩話處士以布衣思自奮功名永陵時上言十事不納穆宗即阼復走京師進三大禮疏其略曰我太祖高皇帝文德武功前此未有一傳至建文君紛更法制文皇帝於是訓兵除之即位之後悉復洪武舊制夫成祖未即位之先建文君天下者也四年以來其措置雖不足觀然有一日之君必有一日之政事而使之湮沒不傳將來者何以徵也且洪武三十一年爾今日三十五年宜賓天之後猶能撫綏四海統理萬幾此非所以示信也陛下宜勅令史官修其一朝實錄仍以建文年號復告高廟而追謚之庶幾文獻足徵可以信今而傳後矣又按正統十四

年也先入寇大同失利太監王振不與大臣謀議獨挾天子親征命鄒王居守師駐土木天子蒙塵京師大震皇太后召百官入集闕下命鄒王權總萬幾既而復命鄒王宜早正位蓋以時方多事國賴長君故也王涕泣固辭於時文武羣臣交相勸進然後不得已即皇帝位夫土木之難非國家大變哉當是時社稷為重君為輕使非景皇帝預登大寶臣恐天下之事難言矣况多難之秋篤任于謙選將擇能練兵主戰宗社不至於南遷伊誰之功歟及英宗皇帝駕還景皇帝迎拜相持而哭推遜良久授受之意昭如日星一旦不豫英宗復位此天之所順也人之所歸也而賊臣徐有貞輩迺貪天功以為己功首倡奪門動搖國本駕言定策獵取侯封構骨肉無己之禍端損國家萬年之元氣遂使景泰七年君臨天下之號一旦改除于謙社稷之臣竟死刀下每讀國史流涕傷心不能不飲恨也英宗復鑒其誣深懷怨悔未及改遽爾上賓憲宗敦念親親用成先志上尊謚曰恭仁康定景皇帝然而未得稱宗未饗太廟歷朝因循實為缺典夫人臣有功於國者猶得附饗於廟而况正位於九重之上七年之間社稷攸賴德在天地功在祖宗不幸是駕一二讒賊之臣迺隨而媒孽之遂至不得以列羣宗而安廟祀孔子所謂正名之義安在今陛下即位之始宜明詔中外尊為某宗祔祀太廟以正一代昭穆之倫以敦萬世宗親之義仍以于謙配饗用報有功復勅有司震暴有貞之罪削其官爵夷其墳墓以為將來不忠之戒庶幾祀典可明而典刑可正矣又按太祖高皇帝首建太廟為同堂異室之制而奉玄恒裕淳四帝居之成化間九廟已滿下詔議祧於是以太皇帝為始祖以太祖太宗為世室於寢殿後建祧廟羣主以次遷入焉

至嘉靖十七年先帝斷自宸衷獨奉高皇帝為不遷之祖改號太宗為成祖復上獻帝為睿宗而並附九廟祀焉夫太祖有功於天地創業垂統為萬世計尊之為始祖禮之正也獻帝篤生聖子入繼天朝我先帝一念報本之心不能自已而尊之為帝祀以天子之禮此猶可以義起者若升祔九廟而與列聖並饗臣不知於義何取於禮何居天下之分奚辨乎昔武王纘太王王季文王之緒以有天下是天下者太王王季文王之天下也故武王得以追王太王王季文王也猶我太祖之追尊四祖也今先帝所嗣之緒果纘之獻帝乎抑纘之祖宗列聖乎使纘之祖宗列聖則先帝之天下祖宗列聖之天下也先帝不得而私其親也今饗其親於九廟之中則是先帝之天下既受之祖宗列聖矣而復受之獻帝謂非有兩統乎此一人之私也非天下萬世之公也我朝之制子為天子其母稱太后不稱后不得並嫡同饗於是有奉慈之殿所以明微也陛下謂君臣之分與嫡庶之分奚殊焉獻帝本安陸之藩王曾北面於武宗者今升祔九廟而與羣宗並列則是儼然居武宗之上矣為天子之母者不可以庶而並嫡為天子之父者獨可以臣而尊君哉臣聞獻帝在藩邸時克遵朝廷制度惟謹天下稱順焉故於其崩也而武宗謚之曰獻夫生而能恪守藩臣之禮未有死而肯倒置冠裳者也今儼然居武宗之上臣恐獻帝在天之靈必以上下之分不可踰也禮義之防不可越也祖宗相傳之統不可私也將感然不安於其位矣夫祭者所以安先人之神也既感然不安於其位則又何愛於附饗何取於太廟哉陛下方將秉正奉公為天下矜式必不以私親之故而廢禮其勅禮部會多官集議再訂廟儀務求典禮之正庶於祖宗祭統不至生嫌獻帝神靈得以安饗而亦不失先皇尊親報親之心祀典由是而正禮義由是而安天下之分由是而辨而萬世人心之公定於此矣以上三事皆言人之所不敢言且倡議於楊時喬詹沂劉曰梧歐陽調律諸臣之先而實錄不書野史失載故節錄之處士善談兵見知於戚少保歸隱羅浮見日峰鄉里稱為見日山人

西游別貞復

君望東海歸子從西粵游興言感今昔行路何悠悠白日往不返頽波逝東流青青澗中蒲泛泛江上鷗連枝與比翼庶以解我憂

楊承鯤 七首

承鯤字伯翼鄞人太僕卿美益子國子監生有

西清閣詩草

詩話伯翼論文謂先民有作穀率存焉不入穀率雖工無當也論詩厭薄王李謂暗中摸索知為今人之詩惟誦之不類今人而不蹈古人之

日言卷之三
迹斯善矣譬如學書然方其心慕手追必盡肖古人及其成也不必盡肖乃成家可稱知言者也

七哀詩 二首

朝發桑乾河暮宿樓桑邨王氣久消落靈跡祕陳根物
色遞遷化日月屢崩犇奈何此征夫跋涉無朝昏驅車
冒榛荆忍飢過市門餘雪照墟里頽陽藹荒邨隴墳鬱
相望賢達無一存顧彼翳桑人太息涕潺湲
客行無昏曉乘月理歸軒仰視明河低畢昴正闌干繁
霜生肌骨齒戰不能言空野無人聲雞犬互悲喧羸馬
爲哀鳴僕夫自辛酸行行日已老帝鄉日已官朔風裂
緇衣客歸苦不早燕雀懷故棲游魚思在藻日月逝不
處誰能長美好眷我平生親言旋永相保

無能

漠漠島烟合紛紛林月生小山全入霧大水半浮城鳴
櫓通晨過疎星永夜明無能逐世好嬾與癖相成

寄題江心寺

勝絕江心寺江空堦影長潮痕剝斷石海氣濕危廊僧
老秋無寐鷗寒翅有霜英雄餘涕泗風雨弔殘陽

小山

還山抱黃犢沙草日蒙蒙竹屋難禁雪松門不掩風香
餘粟葉火寒落桂花叢寥落清江外吾生亦有終

小山歸得長文書及新詩二首兼惠茅栗如數奉
答

茅栗何年種分匡見小奚色兼霜芋早味與露葵齊歛
袖呼兒子嘗新媿老妻永無懷橘日剩有萬行啼

脩園觀刈稻詠懷

老覺衣裳薄寒催捃拾頻尋常邨徑小來往路人新沼
靜飢魚出林界宿鳥馴雞豚與閭巷不厭野夫貧

諸葛鯨

一首

鯨字君騰襄陽人

一云蘭溪人

渝城人日簡字給事

訪舊來何晚輕帆落驛亭江迴劔外白山繞漢中青萬
里逢人日孤城感客星知君懷諫草翹首望明廷

沈懋嘉

一首

懋嘉字會真平湖人懋孝之弟諸生有白巖遺
稟

秋鳥

陳山西麓海東頭細網長竿帶綠鞬買得山禽如粉脆
屠墳十里稻花秋

詩話吾鄉屠康僖墓在乍浦陳山山濱海宰木蒼鬱每東風起有鳥海
外來集於樹土人張羅持竿捕之大者曰截毛鷹亦曰鷗鷁中者曰花
雞小者曰鑽籬剖其腹有青椒其骨
甚脆號為秋鳥文學詩蓋紀其實

裴邦奇

一首

邦奇字庸甫聞喜人有巢雲集

望嶽

衡陽秋色翠

一作碧

氤氳南望蒼梧隔楚雲自去重華招不

返月明瑤瑟怨湘君

黃維楫 二首

維楫字說仲天台人

送王元甫舍人使襄藩

玉門將醞酒使者捧銅圭玉節湘雲外星軺漢水西
恩頒丹鳳詔歌唱白銅鞮山簡流風在能無醉似泥

武林與王符李葉四博士夜酌

烟草碧連天吳山春可憐客情千里外鄉語一尊前
細雨鳴深夜疎燈照別筵關河又明發罷酒各淒然

陳有守 二首

有守字達甫休寧人有六水山人詩集

徐子與云山人詩集

雖不盡離津筏而體裁宛密大雅不羣

詩話山人好游輒跡遍湖海以郡有南浦六州水胥匯於川注海遂自號六水山人一曰天瀛山人又曰斗下老人自比沈麟士王孺仲其詩取材目前不甚鎔鍊所選徽郡詩斤斤繩墨不失正音

游邵氏園

極目眺遠山振衣出東郭白雲媚幽岡蒼烟澹長薄
登皋一舒嘯餘響應林壑空緇城市塵未諧江海諾
夙心愜超曠世故任龍蠖

觀音巖

紺閣披雲竹樹參天花傳說見優曇妙音一去諸天遠
癡絕行人拜石龕

盛時泰 二首

時泰字仲交上元人貢生有蒼潤軒集

詩話沈啓南題倪元鎮画云筆蹤要是存蒼潤画法還應入有無盛仲交画師元鎮文徵仲遂以蒼潤題西冶城之小軒仲交性愛山水去郭二十里為攝山山之左有大城山結精舍其中時跨一青驪欣然獨往嘗為子娶婦其妻戒勿他往忽隨友人往城南古寺數日乃還妻愠而詈之乾笑而已張肖甫開御史臺於句容仲交醉搗戟門之鼓肖甫曰安得此狂生必盛仲交也邀入復飲達旦乃別萬曆初元以陪貢試吳下肖甫謂曰子過姑蘇宜一謁王元美遂攜所著兩都賦謁元美於小祇園元美贈之詩曰遂令陸平原不敢賦三都又三日之內遍和元美擬古詩七十章元美為之氣奪云

初春送朱比部

幾年官寄白雲司日日行吟湖水渚五馬西川今作守
一尊南郭暫相持天邊雲樹依臺遠雪後春濤出峽遲
自昔蜀中饒勝蹟品題應是待新詩

寄武林朱九疑

湖上輕風拂柳條美人吹笛向平橋欲知胥浦潮初退
正是秦淮雪半消

張正蒙 二首

正蒙字子明江寧人

顧太初云隱君年九十餘猶能日行數十里無倦不多飲酒而善飯如壯夫詩

法中盛唐饒王孟韋柳之趣

商人怨

江上商人歸試問商人事商人不敢言相對但垂淚
過王德載牆東別業

舊是君公隱相期共避喧落花春雨巷垂柳暮烟邨
外青山出尊前白鳥翻澗聲流不竭吾意欲尋源

馮敏効 一首

敏効字忠卿平湖人給事汝弼之子有小有亭集

舟行

水遠連天碧秋深共客寒孤舟迷去路頻對夕陽看

程伯陽 一首

伯陽字師道歙人

王仲房云師道家貧賣藥自給詩多漫興而沉思者自入法

過南山懷許宣平

仙人去已久訪古經南山丹竈亦已沒白雲長自閒風吹桂枝綠雨落桃花斑空傳負薪句沽酒何時還

馮科 一首

科字子盈嘉善人布政使盛世之父有東皋吟

吳江逢越客徐生

賣藥長為客浮萍寄此身因沽吳市酒得值越鄉人白雨三江暗丹楓十月春追思十載事不覺淚沾巾

孫文簾 一首

文簾字伯諧歙人

王仲房云伯諧好神仙山居獨行洞簫在佩不顧俗人訛笑其詩任性放吟嬾於祖述間

有合作便越凡情若行人欲問前朝事翁仲無言對夕陽足稱佳句

逢鄉人

爾從山中來恰喜江上遇吾家老梅花開到第幾樹

曹昌先 一首

昌先字子念一字以新太倉人

少年行

長安兄弟舊知名半是期門半射生醉就胡姬壚畔宿
明朝齊赴受降城

欽叔陽 三首

叔陽字遇公吳縣學生入國子監有集

詩話太監孫隆以督織造駐蘇州朝廷方起稅額惡少年行賄克委官乘輿張蓋勒索商稅民不堪命崑山人葛成率眾二千人分作六隊一人搖蕉扇前行後執挺隨之知長洲縣事鄧雲霄見民情洶湧檣委官頭目械於玄妙觀眾立毆死裂其尸知府朱燮元勸諭始得解散此萬曆二十九年事也時葛成慷慨就獄後得宥罪又二十餘年而有顏佩章等實先啓其兆云遇公謠凡一十三首茲錄其音節近古者

稅官謠 三首

四月水殺麥五月水殺禾茫茫阡陌殫為河殺禾殺麥
猶自可更有稅官來殺我

千人奮挺出萬人夾道看斬爾木揭爾竿隨我來殺稅

官

稅官來百姓哭虎負嵎猱升木壯士來中貴走十二人
三授首歡樂崇朝不及夕倏忽頭顱已狼籍投畀烏鳶
烏不食

張名由 二首

名由初名凡字公路蘇州嘉定人有張公路詩

集

詩話公路居平世而好言兵棄家產僮僕以避徭役可稱知幾之士蓋先唐婁程李四子稱詩而學文於震川者

吉貝辭

禹貢故江道今已失其真西亂北入婁浦東接春申中
淤百餘里高飛起黃塵三年棄不治地頗生理殷九夏

日言終卷五十一
穰鉏出三時雨露新吉貝萬餘頃其葉何蓁蓁秔稻產
三吳初不係海濱陵谷日變遷造物亦至仁嗟嗟肉食
謀此理難具陳

空堂

秋蟲響空堂纖月下幽渚鳥驚風外林花落庭中樹羈
棲興遠懷城河隔新雨耿耿良不寐脈脈以無語

俞安期

十三首

安期初名策字公臨既更今名改字羨長吳江

人有翠翠集

錢受之云羨長嘗以長律一百五十韻投贈王元
美元美為之傾倒已而訪汪伯玉於新安訪吳明
卿於下雒頗依諸公以起名才氣蓬涌晚錄厭薄窠臼而聲調時時闌
出不能自禁矣朱雲子云羨長語多雄壯如望海云星臨東極無分
野山入南荒有沃焦廬山絕頂云爭趨大海千江定鏡入中峰兩郡分
寄臨洮監司云桃花東道來天馬木葉西山見玉根寄建昌兵備云笮

馬全教歸漠北竹王那
許檀南中皆名貴可傳

詩話羨長之名由元美明卿伯玉而成詩亦兼綜三家原本李獻吉長
於獺祭賦景有餘言情不足如入隋苑觀翫綵花青紅碧綠非不爛然
奪目即而視之與
根株總不相附

烏沙阻風

獵獵闐闐風吹彼江漢流崩流一何急阻我西行舟擔
篙引百丈人力非不周但如宋都鷁退行良非謀旅情
既昏亂朱炎苦相讎畢竟泊楓林繁陰結綢繆憶從辭
妻孥再見萸葉抽前期猶漫漫返顧多沉憂沉憂不能
揮奮思弋青丘

武夷

二首

晨興命篙師溯流泛清汜鷁首轉石湍九曲茲其始峰

明詩卷六十三
巒縱異姿崖壁夾重詭參錯駭愕形萬狀不相似林林
從孤舟紛紛列兩溪回眺天柱石端立若冠峙其上亦
宏奧云有天池水易代投玉簡遣使歷千禩子騫謫居
時仙客咸來止晉代八真人異姓四女子謫籍周有期
上昇具由此控鶴彼何人曾否來主禮
繫纜仙船巖三曲漸已及云何二仙艇中壁懸石隙歲
月固不知神化亦奚測更無堯年潦安得逮茲息豈墜
絳渚間天路將安適或由巨靈掌攜之化人國莫謂藏
壑牢夜半負有力願借拯迷津衆人免沉溺

神鴉行

甘將軍廟富池口廟前羣鴉何太馴商艚經過浪索食
撲刺雙翅飛近人上投餅餌或片鬻高挈低攫疾若神
競言此鴉莫彈射將軍精靈所變化中之不斃亦不傷
風波恐使神明咤吁嗟乎將軍氣槩籠古今強吳捍魏
人所欽精靈縱化亦貔虎安得瑣瑣為微禽神鴉神鴉
汝曹憑藉將軍力不加彈射還投食何殊僕隸在權門
安然請索無不得

卜居陽羨

雞犬成墟落蕭蕭半畝宮湖山元作長田舍復稱翁五
口中人產千家太古風無由知帝力耕鑿自為功

憶家

故國千山外經秋遠別離浮生能幾日為客此多時衰

眼高堂淚寒砧少婦悲天涯念游子風雨共淒其

青草湖

秋霜枯洞庭秋草入湖青
漁屋遷卑壤風帆就遠汀
鴈鳧沙不整魚鼈塹多腥
回想波濤日陰沉託水靈

過洞庭湖

南北占星日相隨任遠飄
輿圖輪浩蕩舟楫變昏朝
鴈力翻風盡蛟宮隱浪遙
最憐無定處雷雨失青霄

望海

積氣茫茫九水都望來空闊盡
東隅雲霞午夜浮光動
雷雨中流片影孤日有靈鳥棲
析木時無游馬繫秦蒲
島夷向識滄波道烽燧防春亦遠圖

送顧道行副憲之山東

鬪雞走馬俗稱雄絕島窮邊路亦通
卉服仍教歸禹貢
短衣須遣變齊風嶽雲今古懸
封上海日尋常起夜中
我有所思愁遠道自今長望泰山東

登祝融峰

中天積氣入清涼雲霧翻看地混茫
雨挾蒼龍奔下嶺
星懸朱鳥定南方何年石簣藏金簡
自古山祇禮赤璋
壇上長流青玉乳神池高捧帝臺漿

謁禹陵

水土開荒服憂勤任聖躬八年忘內顧
四載畢前功歷
數虞咨及巡游夏諺同會稽臨絕徼
道里記方中玉帛

諸侯集梯航萬國通重輝扶舜日後至戮防風論德人
無間傳家祚莫終寢園非遠隧祠廟異卑宮祭本天酬
孝民猶俗尚忠穴深藏詭物石立寔神工祕守玄扈使
奇探太史公爲魚心感歎酌水意尊崇草莽成臣禮精
靈鑒鄙衷願爲松柏樹朝暮護青蔥

東濠雜興

青谿東九西九白鳥朝雙暮雙結屋何殊柳浪投竿別
是桐江

何白四首

白字无咎永嘉布衣有汲古堂集

錢受之云无咎幼時爲郡小史龍君

御爲郡司理異其才爲加冠集諸名士賦詩以醜之爲延譽於海內遂有盛名

詩話无咎起於側微事容有之第考萬曆庚辰履歷龍君御初授黟州府推官鐫級改温州府學教授入爲國子博士未嘗任温州司李也按齊尚書殆亦道聽之說汲古堂集原亦出於七子頗與俞羨長相近

長干客舍同周叔宗夜坐分生字

莊塗鞵塵軌末路多所嬰况復歲道盡懷歸軫予情之
子秉高韻神恬物自輕處順鮮有觸居喧若無營偃仰
寄一室展玩忘寢興高梧散縹帙風琴落虛聲欄卑景
先夕墉高曦易傾幽光代明燭寒月暖前楹焚枯命芳
醕歡燕惟平生情披語已洽壘虛時載盈寸懷得所遣
冀此數來并

村翁行

老翁耕種居西邨白頭不到城東門翁言淳朴日非昔

我覺勝兒兒勝孫大孫自託能當戶負租往往凌田主
日斜歸自縣門來桑下乘涼說官府

淮陽歸興

淮泗秋風動地來月明如水鴈聲哀南經伍員吹篳市
北眺曹公較弩臺歸路漸香菰米飯佳期已負菊花杯
愁聞烽火連東北極目浮雲黯未開

莫愁湖逢程德懋

莫愁湖邊驚暮春暖風霽日搖青蘋柳條繫馬不辭醉
飛絮滿天逢故人

陸

弼

六首

弼亦名君弼字無從江都人歲貢生有正始堂

集

李本寧云無從詩有六朝之靡曼精工有唐宋之舒緩流暢各臻其勝

有鳥

有鳥東南來爲巢良已劬彼鳩胡弗仁一朝奪而居我
躬不遑恤安所念拮据逝將訴上帝九閻莫可呼鳳皇
三歎息謂鳥亦何愚不聞晉與魯封土百里餘三桓逐
其君六卿析其都遂使帶礪邦忽焉爲丘墟自古皆有
然勿謂天道迂天定能勝人茲理若轉樞

韓侯祠

秋風開古廟聞此祀王孫漫說封侯相徒傷過客魂楚
歌空激烈淮水易黃昏我亦懷知己漂零未報恩
哭亡弟惟良

早罷諸生籍貧無季子田暮齡看汝健朝露竟余先無
復誇聯玉徒令歎逝川山齋姜被在攬處一潛然

哭梅季豹

失意長為客招魂忍向君生難逢醒日死孰問遺文末
路淹蓬累他山隔鴈羣蕭蕭桃葉渡團扇掩秋雲

謁于肅愍公墓

荒墳鄰近鄂王宮異代孤臣伏臘同北狩忽聞哀痛詔
中興多仗保釐功百年社稷回元氣五夜松杉起疾風
聖主祇今恢廟略玉門聞已罷和戎

晚泊毘陵諸君攜酒過集舟中

孤城春水浸桃花白髮逢君酒重賒一曲清歌滿船月

不知今夜是天涯

黃克晦八首

克晦字孔昭惠安人有黃孔昭詩選

沈嘉則云孔昭多深沉之思本

之雄渾發以春容情以景生語必自鑄字不虛設氣完神定大雅之材
朱秉器云孔昭詩意常獨造雖以古人為宗而不蹈襲片語
默云孔昭詩如入幽林長薄其樹木皆世所有而鬱
然翁翳祇覺老蒼歷下瑯琊但稱虛謝未能或先也
詩話孔昭少為画工壯歲以詩名其金陵游橐則張仲立刊之西山唱
和編則李于美定之金臺詩則林登卿鐫之登卿稱其古風天籟自鳴
近體森然紀律青溪社
集諸公允當推為祭酒

感時

繁霜凋草木谿谷正悽惻玄冥慘不舒改歲固云逼萬
物各有因盛衰迭今昔寧見武安門猶納魏其客

江行

江風來自北弭櫂江水南白浪聒不息游氣昏空潭曠
野何蒼蒼引步隨幽探鹿鳴求其牡豐草非所甘江燕
啄不食念雛聲誦誦物性固如此游子何以堪慨彼江
中水衝波無定端古人忍飢渴旨矣非空談

夢游武當山懷鄖陽江使君

祝融奠朱方五嶽有定目胡不以慕山竝列而爲六夜
夢登其巔游氣承我足千峰歷嶮巖如車走平陸上爲
帝者居星辰纏其麓崢嶸羽人宮參差徧巖谷中有不
死人終歲茹草木授我鳥迹書奇文不可讀雞鳴忽焉
寤惋歎淚相續

聽話西苑

雷殿清虛太液秋至尊多在望仙樓樹深宮闕東西合
月出東西下上流麟圃紫芝春曄曄兔園白鹿曉呦呦
軒皇鼎在龍髯斷露箔風簾不上鈎

送何仁仲鴻臚

乍列鸕班黼座前懷山歸櫂忽悠然靡蕪曉過湘妃廟
葭菼春迷宋玉田白雪新聲供奉曲悲風古調別離篇
重來何處偏相憶問我朱陵訪道年

病中風雨寄歐楨伯

薊門衰病颯驚秋風雨蕭蕭獨倚樓四海新知名下老
頻年多病客中愁雲連北極迷宮樹水發西湖出御溝
京國逢君歡不淺可憐經月罷同游

欵乃曲 二首

五虎山如五虎蹲盡對無諸舊國門無諸去後山空在
秋草蕭蕭日又昏

微茫星月下江鄉三十六灣江水長夜半舟人相借問
好風日出到洪塘

鄭 琰 二首

琰字翰卿閩縣人

徐興公云翰卿工七言少游邊疆集中多悲壯語

詩話翰卿詩名籍甚興致故超七言近體全得力於唐詩鼓吹者

贈顧小侯

甲第連雲瞰帝城畫簾繡箔照朱甍新開馳道千金埒
舊領團營七較兵方士房中龍虎鼎侍兒花底鳳皇笙

燕山二月春初好玉勒朝朝待曉鶯

黃山道中

微霜風物色淒淒路入黃山是五谿帝子不歸汾水上
行人愁過穆陵西荒原曉露銅駝泣古驛秋風鐵馬嘶
獨客傷神家萬里斜陽征鴈楚天低

胡宗仁 三首

宗仁字彭舉上元人有知載齋橐

姚園客云胡彭舉如空山泉落薄晚

靈明 顧太初云彭舉詩奇峭多新致 錢受之云彭舉隱冶城山下本富家子老而食貧不謁時貴畫師子久雲林嘗詠唐六如詩聞來自寫青山賣不使人間作業錢殊自得也有詩二千餘首鍾伯敬為論定每自誇其寒星徹夜疎明月為我至以為神來之句亦可見其清思也詩話彭舉詩頗清真惜橐為楚人論定必去其菁華僅存皮骨矣

立秋後夜起見明月

深夜見明月漸低西南隅光華射虛檐照我牀頭書開
函見細字歷歷如貫珠老眼未能讀惆悵坐庭除風生
梧葉鳴光景殊蕭疎昨方入秋序清涼便有餘

閒居寄友

家住青溪曲春深花竹迷君來若相問直過西梁西

桃葉渡

桃葉渡頭桃葉春家家姊妹鬪妝新不知何處初來客
未省吳姬解笑人

王嗣經 二首

嗣經字曰常本姓璩上饒人

郊遊

禁樹青郊外重城綠水濱園林春閏月花鳥晝晴時遠
岫平浮檻清泉曲到池晚紅翻蛺蝶新綠坐黃鸝烟斷
游絲見風輕落絮知一陂芳草色禁得馬歸遲

金陵元夕

十二城門徹曉開金壺銀箭不相催行隨燈市家家月
看到花林樹樹梅

王伯稠 一首

伯稠字世周崑山人

長干曲

月出江頭白鷺飛江花采罷濕羅衣儂家住近長干里
自唱蓮歌伴月歸

鄧欽文 一首

欽文字徵父江陰人有倚竹紀游二集

丘念先云山人摹仿

唐賢色澤音調靡一弗具

洪光寺懷陳更菴

寺裏還藏寺山頭別起山磴盤千級上僧占一峰間秀色杯前墮孤雲杖底還元龍負奇好惆悵不同攀

程格 一首

格字良學休寧人翰林待詔有石林藁

蕪城晚望同方太學元卿賦

木落川原一望開孤城客思轉愁哉帆隨斷靄天邊沒鳥帶殘陽樹杪來黃葉疎鐘秋寺暝丹楓兩岸暮潮迴

憑高欲擬參軍賦愁絕西風半草萊

汪乾利 一首

乾利字和叔歙人

泗上

芒碭山前秋草多彭城王業竟如何雲來還作真人氣風起猶傳帝子歌朝鴈南飛離紫塞淮流東下接黃河知君躍馬能乘興一路江山取次過

吳大經 一首

大經字元常常熟人有叢桂軒集

江水

霞明江水淨潮落江帆急白鳥趁斜陽銜魚沙渚立

姚悅 一首

悅字汝閭秀水人

秋興用杜工部韻

洞庭林屋逕逶迤震澤涼生萬頃陂
菰蔣浮沉隄畔米芙蓉開落澗濱枝
琳瓊書付靈威守鰈菜船從范蠡移
七十二峰吾歷遍湖天疇識客星垂

錢應晉 三首

應晉字次卿海鹽人萬曆丙子舉人
蓬州知州有閩風館集

九日故城舟中

無處尋籬菊何人送酒來故園知滿徑
此地少深杯岸

柳霜前脆雲鴻日暮哀悲秋憐楚客懷
抱向誰開

酬金文學

一諾千金重貧交不世情把君書在手
感我淚沾纓推獎期先達泥塗艱此生
秋宵相望處但有月同明

過河間憶許長孺侍御

攜手登臺畔存亡憶昔時酒家仍舊所
柳色換新枝對月杯難覆攀條淚欲滋
風流何處覓逝者竟如斯

徐冽 五首

冽字仲容吳縣人萬曆癸卯舉人有嘯
碧堂詩集

踏車曲 三首

明詩綜卷六十三
阿伴五更來喚儂踏車去赤日已三商踏車未教住
人言田家樂不知踏車苦憐歡氣力微代歡當卓午
東邊鳳仙花西邊烏桕樹不教儂上車那共歡一處

夜坐對酒 二首

松醪初熟甕生香數盞醺然對夜涼好拂桃笙魂夢穩
月斜桐樹影初長
已許侯封在醉鄉百年須醉萬千場不嫌醉裏踈狂發
自是先生醒更狂

戴灝 一首

灝字升之嘉興人萬曆丙午舉人

宿僧院

共宿高僧院深杯賦茗柯鐘聲沉遠樹鴈影度秋河近
海金風早安禪白法多上方今夜月猶向斷橋過

明詩綜卷六十三

明詩綜卷六十四

小長蘆 朱彝尊 錄

秀州 汪繼燦 緝評

林世璧 二首

世璧字天瑞閩縣人有彤雲集

靜志居詩話天瑞為龔祭酒用卿女壻嘗從婦翁游鼓山分韻賦詩時天瑞已醉詩成題壁有眼中滄海小衣上白雲多之句坐客皆歎以為不及徐惟和詩云聞尋老衲叩禪堂墨跡淋漓滿上方一自題詩人去後白雲滄海兩茫茫蓋為天瑞作也覽彤雲集終卷才雖敏而調實庸

月

玉露晴初墜天河迴欲流誰憐今夜月還似去年秋影
逐寒雲起光緣暮杵留關山千萬里偏照漢家樓

早冬寄懷

日言錄卷之四
嬾慢陶元亮經年獨掩扉不知秋色改但見菊花稀落
葉階前度寒禽樹上歸停雲那可賦徒爾壯心飛

汪禮約 二首

禮約字長文更字士垓鄆人太學生

采藥行贈族子銘孺

朝出斲苓暮采薇白日忽落蒼烟飛荷鋤歸來倚深竹
落花清露香人衣我家阿咸頗解事提籠遠自江城至
肘後三千禁架方囊中數卷軒轅記眼前孺子總紛紛
少年提領爭如君何當共爾尋仙去采藥天台卧白雲

寄懷

朝雲不散暮雲流溪上茆堂水竹幽忽見斜陽滿高樹

亂蟬風葉似深秋

東漢 一首

漢字希節華州人

無題

嫁來依舅姑不省堂前路自君去桐廬夢熟橫江渡

姚和鼎 一首

和鼎字長公長洲人

懷胡孝廉謁選

偃蹇慚予拙飛騰羨爾行春風燕市酒夜雨闔閭城吏
隱懷方朔貧居笑馬卿相思有尺素愁殺鴈歸聲

許賓 一首

日言終卷六十四
賓字觀父休寧人

入新安界

十日疲行役雲山接大鄣馬啼知故道人語別殊方過
雨防沙溜臨溪問石梁羅含家已近蘭草徧池塘

費元祿 一首

元祿字無學鉛山人有甲秀園集

勞勞亭

八月金陵秋氣涼勞勞亭畔立斜陽誰家別淚沾紅袖
幾處秋風起白陽沽酒城邊頻繫馬聞歌道上總思鄉
古今不盡東流水多少行人為斷腸

梁有謙 一首

有謙南海布衣

寄贈翟將軍

短髮蕭蕭鶚是冠獨將詞賦老江干停杯却憶西征路
一片青山戰後寒

逯希韓 一首

希韓章丘人

山居

白髮山中老飄然遠世躡泉流分燕尾詩橐束牛腰笑
傲花三徑酸甜酒一瓢披襟坐明月席地話漁樵

胡一桂 一首

一桂字百藥鄞人

吳興九里石塘即事

路出桑陰盡澄湖野望賒菱歌依岸柳舟影入蘆花烟
起迷邨白雲移見日斜異鄉風景在羈客倍思家

汪廷訥 一首

廷訥字無如休寧人有環翠堂集

詩話無如耽情詩賦兼愛填詞結環翠亭酒燕琴歌與湯義仍王伯穀
諸人游興酣聯句嘗集唐人詩云狎鳥無機任往來一川晴色鏡中開
竹間駐馬題詩去松下殘碁送客回綠樹碧檐相掩映落花飛蝶共
徘徊物情多與閒相稱莫惜芳時醉酒杯製百家衣可云無縫者已

夏日池上

水靜追涼便林繁得暑遲采蓮木蘭擢佐酒竹枝詞藻
綠魚游處蘋香鳥下時不須遠歸去新月已如睂

邵正魁 三首

正魁字長孺休寧人國子監生有梁園燕臺二
集

白雲湖泛舟

堤畔連青草湖中多白雲扁舟一以泛之子得同羣卷
幔雨初歇看山日欲曛芙蓉未堪把心已愛清芬

過仲開江上居

以我不如意憐君江上邨有田能種黍好客足開尊山
色青當戶潮痕白到門涼生五柳樹晤語謝塵喧

觀太學石鼓

十鼓千秋石橋門列儼然功應昭羽獵世得紀成宣想
像于岐日寧論入洛年法書存斷畫大雅在殘篇色起

雲霞絢光爭日月懸依櫺星自聚照水壁猶聯呵護諸
生重臨摹博士專長同夔樂典豈羨漢經傳後作知難
及他山可罷鐫子雲徒曉事白首獻甘泉

朱應龍 一首

應龍字舜夔一字近臣鄞人有東籬樂府

詩話東籬與沈明臣葉太叔盧澤齊名號明州四傑乘月飲海上大醉
溺死其短歌行云皎皎月明駕言宵征唯君之故不違自寧說者以為
識也 近於

懊儂歌

白舫張青帆載儂歡子去風生柳樹間飄揚落何處

盛以約 一首

以約字孟將一字彥修國子監生

喜雨

好雨終朝徧蓬門野興繁憫農勞苦日植杖桔槔園急
權衝萍葉深池浸竹根怪來雙屐健散步上南原

張三極 一首

三極臨清人

雨後過王明府公署

豈謂金門客能兼大隱名庭空歌鳥下吏散酒人迎綠
水新添砌青山半入城還將江上楫聊為采真行

汪元英 四首

元英字大呂休寧人有栩栩軒橐

感述

鷓鴣巢一枝鼯鼠飲滿腹林深河且廣曷不逞所欲柱
下有遺言所貴知止足疏氏二大夫解組辭榮祿今此
富貴人其欲何逐逐焉知敬器水一滿定傾覆

商山秋日對雨懷永叔仲升

秋雨何曾歇秋深倍寂寥折荷偏淅淅落木更蕭蕭雲
黑多迷徑溪寒半斷橋商山苦幽阻綺角竟難招

有客

有客沉冥久何心自解嘲病遭毛穎役貧絕孔方交歲
月甘含蓼丘園任繫匏不如將子燕華屋託新巢

秋日歸自溪上

清溪一曲石橋橫十里籃輿溪上行水碧沙明看不足

西風兩岸盡秋聲

汪元范

九首

元范字明生休寧人有借研齋草

得吳胙虞書

宿昔與君別乃在江之陽玄陰蔽光景草木日萎黃牀
下蟋蟀鳴野外鴻鴈翔居肆休百工我獨違故鄉跋涉
千里塗空念川無梁有鳥東南飛毛羽何輝光口銜尺
素書戢翼向我竒感君懷好音今我心難忘開械再三
歎意快神自揚離居無幾時所惜道悠長此身非雙鳧
安能日頽頽

張恭父畫柳行

近代何人能畫柳東吳張生稱國手沈周陸治不復作
藝苑聲名生獨有是時燕京風日妍生也拈筆當牕前
墨花片片落縑素千樹萬樹含春烟柔條宰地颺輕縷
密葉隱天帶疎雨耳畔疑聞黃鳥聲宛然坐我江潭許
對君此畫融心神頓令價比連城珍不須更寫河橋色
落日蒼茫愁殺人

泊丹陽

晚次丹陽道舟停赤岸林雲容垂嶺薄秋氣入江深落
葉隨寒雨棲鳥噪暮陰風帆無定泊行子若爲心

自慎陽抵申州塗中作

冉冉悲徂景棲棲怯問津雲蒸秋變熟野晦晝飛塵壤
俗遙同楚川塗漸入申迷方知計拙幽意竟誰陳

感事呈劉恩徵

宮殿菑尋弭珍奇斂益頻采珠疲百粵織罽困三秦貢
入天威霽繇興國命貧聖心元澹泊蠱媚自宵人

同楊邠州仲啓登太王城

墉堞基猶在臺隍客自過斷雲低阻嶺峻峽束涇河水
納陵陰少民居土穴多遺風勤稼穡千載感豳歌

宿南峰

向晚躋雲嶽峰巔特室荒袖堪揮北斗夢得謁西皇石
馬嘶中夜山燈見上方鈞天聽未畢海日出扶桑

寄邢子愿三十韻

自作西京客深嗟阻舊游涼風生遠道景色入清秋
董澤蒲先脆樊川菊正稠潦收鷓警露霜落鴈環洲積氣
垆邊合寒烟木末流夷猶頻出郭蕭瑟一登樓轉切懷
人思寧銷去國憂眼穿臨渭汭神越繞齊州憶過坊城
畔尋君泐水頭授餐存繾綣下榻媿淹留蓬徑要真隱
瓜畦學故侯避喧歆阜帽抗世擁羊裘側目羣公忌修
容衆女讎扶搖矜鷄雀馳騁棄驂騮貝錦徒虛織華簪
信久抽雄心輸寸翰矯志傲崇丘苑囿晴偏媚文章老
更優歎成荆國寶興狎惜湖鷗漫擬歸同趣翻憐抱別
愁栖栖應去魯碌碌似依劉旅服凋廢緼行裝斷蒯緱
關門繻用棄幸舍轄隨投促席傾宵雨聯牀聽曉籌素
交欣再接新好競相求阮氏才皆俊岑家燕屢修未辭
漢陂夏直愛竹林幽卒歲慚多累餘生實寡謀襟期良
有待會面渺無由契託他山石情懸剡曲舟尺書題字
滅欲致定沉浮

詢李惟寅太保

已就通侯第新辭上將壇不知門下士若箇是任安

程可中

三首

可中字仲權休寧人有汶上集

董次元云仲權詩肖題已爾不挨別門蹊徑寫

情已爾不共古入生活 陳伯璣云仲權詩駁駁出百穀景升之上

送章元禮吏部左遷羅定

謫籍名猶借君恩轉覺饒朱陵南紀盡丹闕北辰遙安

置憑荒裔明良願聖朝枕椰林樹外僕馬影蕭蕭

上谷

鈴閣西頭馬埒平紫駟牽過赤繁纓翻身誰中金錢的
嘶入垂楊一片聲

除夕太原府

鴈門南渡路千盤殘曆猶從馬上看白髮醉搔燈影下
錦箏搗殺不成驩

葉太叔 三首

太叔字鄭朗晚更名亭立改字介子鄞人有思

烟集藏山橐

沈嘉則云鄭朗詩醞釀初盛唐諸家而歸宿
杜陵 李杲堂云鄭朗氣格高澹轉造自然

詩話葉君嘉則
弟子別裁詩派

行路難

行路莫登高山中多猛虎行路莫乘舟水邊多伏弩我
是行路人惟知行路苦

小築

性本耽篇籍尤憐誦絕交先生號東郭小築近西郊花
霧侵衣袂茶烟亞竹梢坐行都自適好鳥語咬咬

曉晴

一月未曾乾一日雨聲昨夜喜初回高霞結海晨光滿
錦樹依山秋色開鳩厭舊巢將婦去鷗憐新水引雛來
清羸衰疾何時起獨抱漁竿坐石苔

吳紹奇

四首

紹奇字淑甫桐城人有撫松集

螢

忽向籬邊繞還從井畔飛雨昏光不滅露重影猶微伴
讀來書舍窺眠入翠幃黃花秋老後未識汝何歸

浦口

水市千門列江邨萬井通馬嘶流水外人語夕陽中雪
浪高吹樹蒲帆軟趁風故鄉天際遠雙目送飛鴻

編籬

負郭幽居僻編籬接短牆種瓜看蔓引栽菊待花黃犬
吠驚殘月雞栖趁夕陽貧家隨分事世外得清狂

同友人飲秦淮酒樓

秦淮水漲鱗魚肥滿店楊花作絮飛日暮酒闌無箇事
渡頭閒數画船歸

嵇元夫 二首

元夫字長卿歸安人有白鶴園集

詩話長卿父編修世臣嘉靖辛丑分校禮闈高文襄出其門長卿少年
簡傲獲罪嘉興某推官坐死文襄營救獲免招入都執其手語朝士曰
此天下才也及文襄去位乘牛車出國門次日始有馳使後命長卿之
詩蓋紀其實也一時傳誦謂陽關三疊河滿一聲無此淒楚比還里困
甚歲暮大雪李給事樂語家人曰此時嵇公子必大困因載酒熾炭
權舟從之見嵇方坐漚次酌水相與劇飲而別茗中傳為佳話云

立秋日盧溝送新鄭少師相公

單車去國路悠悠綠樹鳴蟬又早秋燕市傷心供帳薄
鳳城回首暮雲浮徒聞後騎宣乘傳不見羣公疏請留
三載布衣門下客送君垂淚過盧溝

刈稻夜歸

西莊刈稻夜半歸明月皎皎當柴扉
檉聲隔岸人語近斗柄插江霜氣微
木葉蕭蕭覆林屋蘆花茫茫藏釣磯
兒童邨南酒家去野夫獨立風吹衣

吳璜一首

璜字汝震鄞人

曉發金壇出黃堰有懷箕仲田叔

山縣侵晨發舟行何處邨宛然新水竹疑是舊柴門
急雨來江口飛泉出樹根無由尋二仲幽思共誰論

黃好信一首

好信字仲孚揚州興化人有默齋詩集

春鴈

萬里湖南鴈春來又北飛亦知鄉土異不戀稻梁肥
絕塞心先到長河影漸稀玉關門外客應待問征衣

公鼎二首

鼎字蒙陰人侍郎鼎弟有小東園詩集

都城元宵曲二首

躩蹠驂駟氣正驕垂鞭嘶過玉河橋不知明月誰家怨
腸斷樓中弄玉簫

內園湯火漫相勻種得紅梅放早春莫向樽前吹玉笛
朝來愁殺賞花人

李桂一首

桂字 番禺布衣

江上

鯉魚風起荻花秋
露壓蒹葭水不流
何處津亭夜吹笛
白雲明月總關愁

盛鳴世 六首

鳴世字太古鳳陽人國子監生有谷中集

錢受之云太古

剪刻鮮淨措置清穩盡削常調實為一時之雋如烏啼白門夜月上一樓霜錢郎復生何以過此

詩話太古五言圓潤貼妥其源出於郎士元

沈水部官署

江水流何急歸心却似之
已傷為客久轉恨別君時
斷鴈迷寒渚吟後挂冷枝
生涯兼物色何處不堪悲

贈隱者

只在高霞外無人識
去蹤伴猿栖一室放鶴下
孤峰丹竈雲中火青天夜半鐘
平生長往意相望不相從

送柯孝廉之巴東兼呈黃廣文

去問巴江水荆門更向西
挂帆秋葉落上峽夜猿啼
舊侶傷飄泊新歡惜解攜
湘潭憔悴地已恐旅魂迷

七月八日潞河舟中別長安諸子

天漢龍初返星橋鵲乍分隔
河收片雨宿浦有殘雲復
作孤舟別兼悲一葉聞相看
此時恨不獨在離羣

宿麻河

積雨湖田沒居人生事微
白魚休市早烏鬼載船歸
月

黑邨春盡林深岸火稀
緯蕭眠不定中夜賦無衣

題岳陽酒家

巴陵壓酒洞庭春
楚女當壚勸客頻
莫上高樓望湖水
烟波二月已愁人

傅

梅 二首

梅字元鼎邢臺人有簡翁詩集

園居

晝勞夕得適幽軒
成小憩峰色落空青
池光起浮翠須臾
暝色深繁星看欲墜
新月下疎篁微風動
檐際樂此坐忘言
悠悠更忘寐

沔池有懷

會盟壇下沔池流
草色連天蔽故丘
隴月只看懸太白
秦雲不解到幽州

汪應宿 一首

應宿字南仲歙縣人

送王祠部僉憲貴陽

地入三苗盡山過蜀道難
飛泉晴亦雨毒霧晝猶寒
方竹迷秦徑羶裘拜漢官
西南民力竭君好慰凋殘

應 臬 一首

臬字仲鶴鄞人縣學生有楚游烏溪詩草

烏溪

寄我江湖流浪身
烏溪山水故清真
春田雨足騎秧馬

秋隴禽多縛草人睡起竹牕書一卷坐來莎石酒三巡
願如在巷顏夫子到處簞瓢不厭貧


李宗城 一首

宗城字汝藩盱眙人

送臧晉叔國博還吳興

宦自潘安拙才應宋玉偏還家千嶂雨挂席五湖烟以
我多愁日逢君失意年江干一尊酒寧不倍淒然

陳鳴陽 一首

鳴陽字  南海人參政萬言子

閨情

露冷凌波步不前流螢相撲自年年妾身未似齊紈扇

不待秋來已棄捐

林國光 一首

國光字廷錫閩人

金陵尋舍弟聞先三日往蕪湖悵然賦此

春江雨漲綠平堤岸柳青青拂水齊日暮相思不相見
鵲鴿飛過野塘西

王之鼎 一首

之鼎字象玄江陰儒學生

贈友人卜居

高士移家處來尋路不迷雞鳴深巷裏門掩斷橋西招
隱仍栽桂看山獨杖藜平生厭塵事今日遂幽棲

何璧 一首

壁字玉長福清人

詩話玉長任俠見知於黃陂張濤張後開府遠東將疏薦以布衣拜大將會罷鎮乃止濤卒入楚哭之遂以病死亦矜奇之士也寄友詩云士到出山誰不賤術惟游世最難工足當阮生之泣矣

西湖尋曹能始

垂楊漠漠苻田田何處春風十四絃放鶴僧歸三竺雨
聽鶯人過六橋烟詩尋蘿薜誰邊寺酒載桃花第幾船
游子天涯魂易斷非關春樹有啼鶻

汪樞 二首

樞字伯機鄞人有存俟篇

詩話伯機世祿之家不樂仕進治別業曰泡園賦園居詩六十首閩人徐興公極稱之

懊懷曲

千金買妾身一旦遠行邁大艣如屋寬底事不相載

早秋刈穫述懷

杲杲朝日升垂垂水田熟嗚嗚呼白雞泱泱飲黃犢稍
稍溽暑收灑灑露華沃庭戶絕追呼春秋足魚菽卒歲
計所餘脩我牆與屋男悅女欣欣杯炙勞僮僕躬耕一
丘田飽食詎非福

戴景明 一首

景明字晉仲休寧人有團雲詩集

深秋山居

莓蘚深層岫松杉漾北涼清宵唯鶴唳盡日少人逢倚

檻三秋老攤書萬事慵夜分魚鳥靜明月半東峰

沈瑞徵 二首

瑞徵字靈繹海寧學生有慧尼遺集

尤展成云先生詩清而有則中

多激楚之音

詩話先生五言如落木悲秋氣浮雲起夕陰雁聲春半少寒色雨中多野犬迎人吠流鶯隔樹聞雪鷗輕片片烟樹遠冥冥竹翠侵衣濕峰陰入戶涼高者近大曆十子下亦不失為四皇甫也惜年未四十而沒遺詩一卷孫翰林編修珩刊行之

杪秋同諸君游石井山

絕巘攀躋外蒼茫秋色殘雲山千里出烟樹萬家攢石
轉奔濤壯天空落日寒扶桑一矯首海氣正漫漫

錢清夜行

秋漲乘流好孤邨夜泊稀魚榔過橋遠螢火傷舟微堤

沒聞爭渡涼生欲授衣夢歸懷土切山水願多違

侯維垣 一首

維垣字師之儀真人國子監生

九日送友入九華

秋空削出青蓮花時吐白雲含紫霞九月九日九華去
此中可以鍊丹砂

江禹奠 六首

禹奠字其永休寧人僑居吳縣國子監生有玄

芝館詩集

王伯穀云山林臺閣各有體裁其永作山林詩却無寒儉語張伯起云其永詩有軒爽之致

詩話其永與王伯穀共肄業於留都而詩名未振然其五言清切如秋雨半沉閣夕陽已在山落葉半庭月啼烏滿屋霜寺出寒烟外山沉細雨中雨洗松根石雲開屋後山山影隨帆轉溪聲挾雨飛久有青山志因歌白露詩頗類鵝池生

明言錄卷之十四
夜坐七松齋中懷睦州嚴徵君

茅齋結翠屏獨坐酒初醒殘月半牕白孤燈四壁青篋
中換鵝帖几上種魚經遙望投竿處寒雲隱客星

嚴陵城下

背郭千邨合中流一剝孤輕陰閣秋雨殘照落平蕪入
市魚鰕少歸舟雁鷺呼客囊任羞澀解珮問當壚

被放偶占

放歸吾嬾甚二月寄僧居無日不飲酒有時還著書泉
飛茶臼冷雲動竹牕虛徑僻少塵跡青苔久未除

東倉

信宿翠微上翛然絕世氛喬林含曉日清磬落層雲母

色當牕見泉聲入夜聞半生塵土夢俱向此中分

九日登山

東籬菊蕊半含黃酒伴何須定故鄉寄語柴桑陶處士
百年風物幾重陽

邨居即事寄天都李使君

日照雲林宿雨休一灣溪水入江流野人家住清溪上
坐對寒山兩岸秋

周良寅一首

良寅字

閩人

夜泊始興江口

繫纜荒山下挑燈細雨前客心共流水搖蕩不成眠

蔣世模

一首

世模字叔範江陰人

江行

晴沙漾漾見飛鳧隔浦帆檣乍有無身在江南望江北
接天秋水浸菰蒲

段

一首

黼字黃甫曹州人有抱璞集

西郊

十里平原地青山遶碧林寒開烟雨色天遠鴈鴻心落
葉還蕭索浮雲自古今不妨乘暇日載酒數登臨

劉

一首

權字叔度休寧人有劉叔度詩集

讀宋史

六龍奔走竟何依粵海舟航事已非回首中原無正朔
傷心左衽乃垂衣身沉魚腹靈均死血染鵑聲望帝歸
愁向厓山瞻王氣寒濤終古蕩斜暉

姚

一首

旅初名鼎梅字園客莆田人

錢受之云園客愛苦吟詩不多作

詩話園客放浪湖海經拾舊聞露書一編頗存軼事其評隲一時詩家遠比效器之近續王元美

山家

水盡重重客路山開處處人家粉壁斜銜落照朱簾半
卷桃花

魏之璜 一首

之璜字考叔上元人

訊程孺文

不得巢湖信時詢渡口居繞籬河路曲背郭草堂虛林
靜風驚犬溪喧晚聚漁主人游未倦閒殺半牀書

汪功胄 二首

功胄字介夫休寧人有介夫存橐

詩話介夫大呂之子善詩而
天存橐二卷大半學李長吉

春日閒居

韶景當春半閒居覽物華綠分當戶竹紅過隔牆花樵
牧依林近溪山帶郭斜閒身甘自放吟卧寄烟霞

樵舍

烟火隱茅茨數家倚山麓林深不見人丁丁聞伐木

金 鎰 一首

鎰字用衡鄞人有桂莊橐

贈同谷山人

太白之陽有同谷同谷之中白雲宿美人結廬谷口居
朝朝暮暮雲相逐我來問君君不言雲裏長鏡種黃獨

王 授 一首

授字子子江陰人

送嘗熟李瑞卿

柳暗花明春雨天鶉鳩聲裏一歸船相逢已是十年別

為問人生幾十年

黃習遠 一首

習遠字伯傳吳縣人有蕭蕭齋橐

寄朱宸卿

與君同里開只隔數家居無日不相見有時還寄書開
尊呼共飲得句問何如自作長干客別來三月餘

高文祺 一首

文祺字壽承廣信人

自君之出矣

自君之出矣不種相思樹思君如春草多在無人處

吳邦達 一首

邦達字非聞休寧縣學生

江樓送別

把袂層樓上虛牕四望平柳烟邨外市花雨驛邊城東
去潮千里南歸客幾程當歸愁欲別津樹重含情

潘 鏞 一首

鏞字聲遠江陰人

寄懷

孤燈一點照書龕離思沉沉睡正酣無那角聲吹落月
夢魂飛不到江南

張 儲 一首

儲字明用新建諸生

聞鴈

孤鴈來何處殘聲靜夜飄江空音泔泔雲重影蕭蕭慣
向風前急偏從聽處遙秦川織錦婦掩淚憶征遼

周應辰 一首

應辰字斗文鄞縣學生有綠莊詩采

詩話綠莊游鄞南臯之門南臯問曰使周生為仲尼弟子將誰學對曰某小人願學樊須聞者以為善於說辭聞人林古度序其詩稱其色古而骨堅

古詩

行行重行行夕陽在崦嵫暮鳥有倦翼寒木無榮枝少
壯不逢年垂老誰見知

朱純元 一首

純元字二芑溧陽人

東溪港

十二街頭跡已賒草堂低占白鷗沙武陵此去無多路
灤水西來第幾家野岸綠蕪飛燕子汀洲紅雨落桃花
滄浪不洗塵埃耳只許漁郎泊釣槎

吳宗儒 二首

宗儒字次魯休寧人有巢雲集

游黃山

九月秋氣高抗策恣游眺天都陟崔嵬洞門入窈窕緩
行憩松根徙倚臨霞嶠探奇壑轉深攬勝景逾妙山蹊
縈以紆石壁陡而峭瀑布挂晴川懸厓迴夕照地與仙

境俱凌厲討佳要孫阮子非倫於焉學長嘯

春夜錢塘江行

小艇發江干入夜東風起帶雨挂輕帆西行三百里

劉時中 一首

時中字伯庸休寧縣學生

有客

有客問烟蘿山家在何處笑指碧溪頭遙遙踏花去

虞伯龍 一首

伯龍字公普鄞人有擔簦集

舟中

寥落明州客孤懷寄短篷江豚偏狎浪舟子但呼風歸

夢隨流水鄉書問去鴻不知今夜月千里可相同

沈木 一首

木字子喬嘉興人萬曆間縣學生有近竹臺

詩話子喬自號靜得逸人夜起一詩具臻佳境

夜起

著夜不成寐起步中庭中殘月忽墮水明河猶在空籬
根滴清露樹杪生微風坐愛新涼好先秋有候蟲

傅邦柱 一首

邦柱字石卿金華人

雜詠

鸚鵡多巧慧交交調好音翻飛嘉樹杪毛羽殊衆禽一

日遭量尉萬里辭故岑彩絲組紺趾雕籠照翠衿徘徊
當簾幕聰慧增苦心鸞斯微以陋提提蓬蒿陰

鄧秉貞 一首

秉貞字子坦宜興人有禹笑齋詩安隱集

嚴子陵釣壇

經過百世見清風爭羨羊裘一老翁不有雲臺諸將力

釣壇亦在戰爭中

徐電發云自有雲臺爭比釣臺高之句作此題者陳陳相因得子坦一詩稍開生面

孫元孚 一首

元孚字

休寧人有滄洲草

草市夜泊

違家才一舍露宿尚河洲暝霧連汀白寒雲壓水流灘

聲鳴野碓燈影隔鄰舟入夜霜風急淒清動客愁

吳鶴 一首

鶴字

烏程人

望潤卿弟

仲月辭家日臨岐接汝書相傳及春暮應得返衡廬衣
逐客程換花隨驛路疎來帆遙數盡不見愴何如

王壑 一首

壑字巽父金壇人有旅言

南安道中

疊疊青山曲曲溪湍流活活雨淒淒孤舟日暮南來客
恨殺鷓鴣相向啼

戎 玠 二首

玠字孟常鄞縣學生有蜀游草

晚霽與客登浩然樓眺錢塘江

晴色開邨樹危樓俯大江潮聲翻絕岸帆影落虛牕水
與遙天合人同夕鳥雙茫茫百端集形影若為降

泊巴東

昔行指川北今始詣巴東山縣無重郭江天有斷虹亂
峰雲欲暝官渡火初紅剪燭供清話蕭蕭暮雨中

趙雲蒸 一首

雲蒸字龍伯太倉人國子監生有世藝齋藁

北上

飛沙如雪晝茫茫始覺長安道路長遙憶小樓臨水曲
八牕風日正虛涼

顧孟林 一首

孟林字山甫吳縣人

寄陸纂父

日日看山色知君在此中祇因一水隔難以尺書通白
乳思林屋青霞記石公儻然乘興去相見對秋風

丁雲鵬 一首

雲鵬字南羽休寧人有丁南羽集

詩話南羽工画其寫神王羅漢骨氣
奇偉不減大小尉遲詩特具體而已

舟次尤溪

客程迷水國山靄護城闈歲涉三冬暮花先十月春魚
鹽通海販橘柚落園珍故舊頻勞慰荒塗未厭貧

方于魯

二首

于魯初名大澈後以字行改字建元歛布衣有

佳日樓詩集

梅季豹云建元詩有唐風 屠緯真
云建元尊函叟而詩不盡稟函叟

詩話古人製墨率用松烟漢取諸扶風晉取諸廬山唐則易州上黨自
李超從歛張谷徙黟皆世其業其後耿仁遂高慶和戴彥衡吳滋胡智
率多歛人明則羅文龍少華邵克已格之程大約君房輩咸以製墨稱
而于魯所製最夥上自符璽圭璧下至雜珮凡三百八十五式刊成圖
譜曾上呈乙覽所造雲箋匪止成都十樣嘗以百花香露和
墨自作長歌世但目為墨工然汪伯玉曾招之入豐干社

送張山人歸越

雉子斑斑麥正齊黃梅四月雨淒淒新安江上攜尊酒
送爾看山到浙西

璞石席上作

十年不慣出家門千里來逢故舊存正值江干春未晚
萋蒿荻笋煮河豚

向杰

二首

杰號培竹慈谿人

題画

雨過迴塘水亂流汕魚人去櫂孤舟荻花楓葉寒江外
獨鶴一聲霜滿樓

寄羽士

幾欲尋真未得閒白雲堆裏望玄關煩君多養雪色鹿
借我來時騎看山

明詩綜卷六十四

明詩綜卷六十四

